

四庫全書

集部

欽定四庫全書

龜谿集卷八

宋 沈與求 撰

劄子 啓

辭免除資政殿學士知明州劄子

臣今月二十六日准尚書省劄子奉聖旨以臣累上章
乞解機政退就祠宮除資政殿學士知明州者聞命感
激涕淚交流伏念臣猥從疎逖誤被簡知寢閱九遷叨
塵二府念大恩之難報顧薄效之靡聞食息省循夙夜

震惕至於審圖恢復之計思濟艱難之期同寅協恭既
初心之莫展投閒置散乃素分之是宜比貢囊封數干
黠聽竭愚誠之迫切荷聖意之周旋付以名城寵之峻
職曲全終始之眷以為去就之光豈臣糜捐所能稱塞
而臣深虞朴拙必致顛隳是以不避瀆煩仰祈矜憫覬
追還於異渥俾退就於真祠庶保孤蹤尚堅晚節臣無
任祈天望聖激切屏營之至取進止

辭免除資政殿學士知明州第二劄子

臣猥以一介無能之質誤被聖知擢陪政路叨冒無補夙夜懷慚遂瀝血誠仰干天聽乞解機務退就祠宮伏蒙矜憐曲全體貌名城峻職併冒恩榮豈臣廉捐所能稱塞感涕橫溢九殞難酬臣雖已具懇辭未奉處分重念臣朴拙之性第盡愚忠孤危之蹤實恃異瞻儻忘素分定致煩言欲望天慈終垂憫察檢會臣累奏除一在外宮觀差遣庶存晚節期報大恩臣無任祈天望聖激切屏營之至取進止

貼黃臣於今月二十一日留身奏事歷陳危懼
既蒙恩許其去拜辭天陛之際玉音宣諭當全
體貌盡禮而行仰荷瞻遇始終感深淪骨所以
跼蹐待命遂至浹旬竊恐中外不知招致物論
重費陛下保全之賜伏望天慈早降處分亟遂
宮祠之請庶免顛隤

辭免除資政殿學士知明州第三劄子

臣伏蒙聖慈以臣辭免資政殿學士知明州恩命特降

詔書不允者危惻瀆煩粗殫萬一恩言慰諭殆至再三
荷聖意之周旋撫危蹤而怵惕伏念臣奮繇寒士本乏
異能曲被冕旒之知叅陪廊廟之列一毫何補百謫是
宜然考平日敷奏之言曷嘗不在於恢復推老生朴野
之學亦欲共濟於艱難而孤根易搖薄命難偶每於曲
折之際倍費保全之恩傾輸肺肝控告君父忠雖許國
義盍引身仰蒙日月之明俯察螻蟻之志詔函使騎眷
禮有加峻職名城寵榮併至既逾私分荐具懇辭天聽

未回欲全終始之遇人言可畏恐乖去就之方伏望聖
慈特賜矜憫悉收還於成命亟畀付於真祠庶幾餘生
免累洪造臣無任祈天望聖激切屏營之至取進止

辭免轉官上宰相劄子

伏念某頃者待罪政途之日適會朝廷重修祿令恭被
聖旨叅預典司及今書成奏御而某去國已歷三時矣
則是某首尾初無一毫之功乃蒙疏恩例叨增秩聞命
失次措躬靡安仰惟朝廷不忘舊臣借此寵私以光哀

朽然某居閒養疾而受無功之賞私情公義皆所不安
伏望鈞慈特賜敷奏追寢成命施行庶安愚分除已別
具奏聞外某無任懇到之至

辭免勅令所修書成轉官劄子

臣九月二十九日准進奏院遞到尚書省劄子為勅令
所修祿秩新書成奉聖旨轉臣一官者聞命感懼措躬
靡安竊以賦祿之等所以馭羣臣成憲之頒所以詔萬
世而臣頃以愚陋濫預典司方庀徒屬稟之初雖粗窺

於凡目達成書奏御之日已阻望於威顏敢謂第名例叨增秩曲荷乾坤之施不忘簪履之遺伏念臣孤負大恩退安真館居閒有祿每懼挺災受賞無功豈忘畏義輒陳愚悃上瀆聖聰伏望特軫慈憐收還寵命非止獲安於私分亦欲免累於公朝臣仰望行闕無任懇到迫切之至謹具劄子陳免以聞伏取進止

辭免勅令所修書成轉官第二劄子

臣十月十三日准行在都進奏院遞到告一道以祿秩

新書成轉臣一官及奉詔書以臣辭免上件恩命未蒙
矜允者天地之恩固欲從厚螻蟻之志終冀獲申罔避
黷煩荐形敷竅竊以上之行賞無濫則人勸下之被賞
無愧則身榮授受之間得失所繫儻事功之未稱顧分
義之何安貪得不言冒榮孰甚惟新書定祿秩之等命
近臣兼提督之官雖用故常曾蒙委使而討論沿革裒
輯散亡則有司存在臣何力矧復屬稟之始臣已去朝
歷時之多書方奏御而臣論功無有受賞何名褒典橫

加驚惶失措是以輒陳奏牘力具懇辭俞音未頒危衷益懼此雖陛下親乘戎輅赫然有為之時而臣退安祠宮冒此無功之賞人誅鬼責將不赦臣公議私情皆恐累國思念朝夕怵惕冰淵伏望宸慈特回天聽察臣愚悃實非飾辭矜從既竭之誠追寢已成之命庶於素分行以少安仰望行闕臣無任懇到迫切之至所有告命臣見寄納湖州軍資庫不敢祇受謹再具劄子陳免以聞伏取進止

辭免勅令所修書成轉官第三劄子

臣近蒙恩以祿秩新書成轉臣一官臣自揣無功輒嘗再具陳免今月二十四日准尚書省劄子奉聖旨依已降詔旨不允恭惟聖恩至渥承命感激涕泗交流然臣於義終有未安須至備瀝血誠復浼天聽伏念臣衰病無庸之身投閒田野仰蒙陛下記憐假此光寵在臣私分豈不知榮臣儻有一毫之功可以稱塞及於近例可以扳援臣亦何敢於此軍旅事繁之際喋喋控敘至於

再三上瀆威尊自干斧鉞誠以此書之作臣實略無勞效固已於前兩次奉劄具述本末兼臣竊見紹興新書之成自詳定官而下第增爵秩提舉官則不與也今臣身既去位乃獨蒙此褒遷反覆思之無一而可陛下遇臣之恩則過於厚矣而臣辭受之義所當盡者敢不披露於君父之前伏望陛下回日月之照察螻蟻之誠曲軫宸慈收還成命豈惟免微臣冒寵之懼庶不累朝廷勸賞之公所有告命見寄納湖州軍資庫不敢祇受仰

望行闕臣無任懇到迫切之至謹再具奏劄陳免以聞
伏取進止

乞回受勅令所修書成轉官與兄監獄劄子

臣今月初二日准尚書省劄子以臣辭免轉官恩命奉
聖旨依累降詔旨不允者庀官無尺寸之功難勝誤賞
瀝懇有再三之瀆宜就嚴誅過蒙寬宥之恩終閔矜從
之旨愧益深而汗溢感彌極而涕流伏念臣家世至寒
資材甚下被服父兄之訓偶玷儒科遭遇聖神之知寢

汚政路比投閒散猶荷記憐稱效云何倣倖如此粉身
碎首曷足報償履薄臨深每知恐懼輒恃天地包容之
量復陳犬馬冒昧之誠重念臣兄右迪功郎監潭州南
嶽廟某少習藝文久困場屋晚霑恩命甫列選階念暮
年手足之情豈忘牽愛顧平日肺肝之懇不敢及私茲
緣異恩庶均同氣仰祈聖造曲軫天慈特許以臣今來
所轉一官回授與臣兄某循轉施行將侈朝廷之寵光
用增門戶之榮耀屢瀆宸聽萬死奚逃臣無任瞻天望

聖祈恩俟罪跼蹐屏營之至謹具劄子奏請以聞伏取
進止

辭免除在京宮觀侍讀第一劄子

臣今日准行在入內侍省金字牌遞到尚書省劄
子奉聖旨除臣提舉萬壽觀兼侍讀日下起發赴行在
所供職者聞命跼蹐感涕交流伏念臣頃以耰耰固陋
之質誤被眷知擢自小官至陪大政一毫無補百謫有
餘仰蒙從欲之仁俯徇投閒之請思愆里舍僅閱歲時

雖存闕之心不忘造次而歸田之幸甫迫衰殘敢圖聖恩驟加收召露門勸讀殊庭奉祠此在累朝實為貴老優賢之地如臣碌碌併冒寵除分非所安兢惶失措然方陛下親乘戎輅力圖恢復之日在臣子之義豈不欲一望清光少伸志願而叨塵非據定致煩言深自省循進退惟谷伏望陛下特軫天慈追寢成命俾臣仍舊外祠休養疾病他日儻或未填溝壑誓期糜殞少答鴻私臣近為感冒風濕左足筋攣日下起發未得見服藥調

治稍可支吾即迤邐前路聽候指揮謹具劄子陳免以聞伏取進止

辭免除在京宮觀侍讀第二劄子

臣今月十二日辰時連准行在入內內侍省金字牌遞到尚書省劄子以臣近具辭免新除恩命正月十一日三省同奉聖旨不允令學士院降詔依已降指揮疾速赴行在所者仰感聖恩涕泗橫臆臣聞君命召不俟駕而行考於禮經固有明訓而臣戇愚朴陋一無寸長伏

蒙陛下曲軫宸慈不忘舊物召以一節之峻俾近天日
之先生死肉骨之恩至深至厚非臣糜殞所能稱塞義
當奔命引途豈應少緩而臣衰病日迫志意瞶昏誠恐
無以上副眷知遂瀝懇私乞賜追寢成命今來疊於疾
置被奉聖旨趣行而臣稽違詔令罪將無赦夙夜震懼
若無所容臣已於今月十四日力疾上道迤邐前路聽
候指揮臣無任戰灼之至謹具奏聞謹奏

為病未及朝見奏知劄子

臣近蒙聖恩除臣提舉萬壽觀兼侍讀臣以疾病餘生
愚陋朴拙自度無以稱塞瞻知夙夜惶懼嘗瀝懇誠乞
寢成命而九日之間兩奉詔書四次被受御前金字牌
降到聖旨指揮催促起發念方陛下戎輅親巡之際在
臣子之義迫於嚴命不遑安處遂力疾迤邐前來已次
行闕然臣所患左足筋攣之疾痛楚呻吟至不可忍沿
路服藥調理尚未全安有妨久立欲於門外將息一兩
日趁赴朝見臣無任戰灼之至謹具劄子奏聞伏取進

止

辭免除同知樞密院事劄子

臣准尚書省劄子正月二十一日三省同奉聖旨除臣同知樞密院事仍降中使宣押赴院供職者聞命震驚罔知所措竊以輔臣之任國論所資況當用武之時尤重本兵之寄欲贊能事宜得偉人庶協成謀用戡多難如臣資材凡瑣性識瞽昏智慮不足以度萬事之宜權略不足以應一時之變頃蒙聖獎擢與政途昧於謀國

已試無能久冒殊榮曾微薄效陛下略其碌碌尸位之
罪察其拳拳憂國之誠得請外祠甫踰旬月遽頒召節
趣侍經帷既獲望於威顏即再申於愚悃覬收蹤跡復
返丘園豈圖異除薦及庸品承命之次顫汗憂惶臣疾
病交攻衰殘日迫儻或更叨委任必誤瞻知伏望陛下
特軫深慈追還成命疇咨人望用厭輿情庶資經濟之
謀以成恢復之業臣無任懇到迫切之至謹具劄子陳
免以聞伏取進止

辭免除知樞密院事劄子

臣伏蒙聖恩除臣知樞密院事聞命之次跼蹐靡安伏念臣頃以至愚極陋之質久污近聯績效無聞退安散地聖恩記錄遽有經筵之召扶持疾病甫及造朝亟被詔除進陪右府而臣已試無狀瀝懇再三天聽莫回俯僂就職方欲勉竭駑鈍少報萬分而才分所拘未有尺寸之效內懷慚懼背若負芒忽蒙超遷莫測所以驚惶顫汗無地自容陛下之恩遇臣過厚而臣所自揣素不

知兵既無策畫仰贊廟謨又無事功下厭人望冒處機
衡之地已為非分而居位未幾復此叨逾歷尋前修未
有其比天下公議其將謂何必至顛隲重累國體伏望
陛下廓天地之照察螻蟻之誠特軫深慈追還成命俾
臣仍舊職任夙夜黽勉庶幾萬一或能少副陛下責任
之意而臣之罪戾亦思得以少寬不勝幸甚謹具劄子
陳免以聞臣無任祈哀俟命迫切屏營之至取進止

啓

代賀帥臣平寇啓二首

帥旗爰舉計出萬全賊壘既平功成一戰吏復專城之
治民還按堵之居和氣遂克驩聲頓溢伏惟某官胸吞
萬象心貫兩儀誠節著乎朝端威名行乎海表龍韜決
策廟堂推必勝之謀虎帳運籌彛鼎載已成之績憤無
知之狂寇干有赫之明威慨然請行期以奮殛具嚴師
律靡須遺鏃之勞克定侯藩俄靖入邪之警屈此羣醜
釋其下人使恩信之兼施知勲庸之益大顧惟弱植獲

佐偏州覩捷奏之交馳激懦衷而竊抃

陳師鞠旅既燁威靈折馘執俘遂平寇虐悉復藩垣之
治用昭帷幄之謀慶溢人神驩均遐邇恭惟某官忠存
衛社業茂安邦威加草木之微信及蠻夷之遠辟國百
里嘗叅總於戎昭教民七年因繕修於武備舉無遺策
動有成功屬鼠竊之貪饕命鷹揚而翦滅果憑勝算亟
正嚴誅一空逋藪之羣永息潢池之盜事皆按堵民乃
奠居建大將之旗往既侔於伐蔡仗元戎之節今復類

於平吳允集茂勲宜膺殊獎佇觀英衮之就拜庶慰高
才之請行乃眷偏州實臨孔道欣覩奏功之日幸臻徹
警之期抃躍之私倍萬常品

代漕臣謝冠平除職啓

轉餉千艘初無異績賜書一札遽有橫恩籍通內閣之
嚴名竊外臺之重是為踰分祇以起羞竊念某遭世聖
明奮身疎逖洊被乘軺之選悉緣推轂之私自去東州
竭來南土適冠攘之竊發會師旅之並興已責薄征詔

必深於恤隱蒐兵筭食法又戒於愆期懼心計之弗充
念力行而勿憚迨聞捷奏仰寬顧憂底藩維之告寧皆
帷幄之制勝罪逃逋慢災已免於求魚命出超踰夢輒
因而分鹿靜言忝冒備見矜憐此蓋伏遇某官亮節立
朝深誠許國有容德乃大包賢否於穀中不私物亦公
置是非於度外顧未遺於下體茲不壅於上聞致使孱
微亦叨甄錄某敢不誓修乃職圖報此恩食藥飲冰將
益堅於操履飛芻輓粟何敢誤於使令

代賀人得郡啓

伏審就被帝綸改臨侯服先聲所暨衆志已孚恭以某
官行配古人名滿當世汪洋德量韜玉海之千尋卓聲
詞源瀉銀河之萬丈蚤由簡注寢歷清華忝乘使者之
軺爰正儒宗之席斯文所託吾道既行載在典型尤以
老成為重溢為吏事皆其緣飾之餘是膺師帥之除用
壯藩垣之勢顧惟弱植久仰崇規茲獲佐於下風實使
償其素志依歸抃躍倍萬等倫

代賀兵部尚書啓

伏審疏恩內朝正位右省推政本於天下統兵權於禁
中國勢增崇輿情協慶恭以某官配古遺直為時老成
清忠格於天淵沈謀驗於著蔡器優大受文武唯所用
之德合中行左右無不宜者逢辰熙洽歷位高華欲加
澤於斯民力告猷於乃后霜臺峻峙歎松柏之後彫天
路廓清見藜藿之不採俾周旋於從橐示登進於公槐
爰陟夏官進司武部上意所注正想聞於履聲僉論攸

歸茲願嘗於鼎寶某早登驥坂久去龍門莫遂趨風長
恨一涯之隔迨茲承命第勤三賀之私

代賀中丞啓

伏審茂膺宸綽榮總臺綱除音下傳士論胥慶恭以某
官爽邦巨哲名世碩儒道積於躬固絕磷緇之變義陳
於色曾無吐茹之嫌志欲有補於時言皆不詭於聖自
結上心之眷倬觀吾道之行慷慨百為夷險一意迨被
賜環之召益敦前席之知更直披垣共推敏翰冠登學

省獨號純師屬中司之久虛委專席而顯拜絳騶分路
已崇堂陞之威白簡飛章必識朝廷之體即期柄用彌
峻巖瞻某遠迹崇閑庇身支郡莫預拜塵之列但馳賀
厦之誠

代賀林中書知揚州啓

伏審誕揚休命就起宗工總秘殿之崇資控中都之巨
屏巖瞻所逮輿頌惟欣恭以某官道濟寰區忠存社稷
殊勲光於盟府舊德冠於公朝凜凜格言常破萬人之

浮議堂堂壯節自誓四夷之野心名家獨富於文章餘
事兼資於翰墨周旋滋久左右具宜遂符夢卜之求早
預機衡之任一心一德聳表儀於百工嘉謀嘉猷大規
摹於四海方需正席孔樂均休復辭管籥之嚴歸踐林
園之勝上心彌簡民望益孚大燾高牙復壯藩維之勢
命圭相印即還輔弼之聯斯言有期指日以俟某猥蹤
使事阻望台光聞天上之除音唯知舞蹈望日邊之歸
路預切瞻依

代人與尚提學啓

絳帷邃密橫經嘗列於下陳金節光華敝板復叅於前
導何幸師資之舊輒居部屬之餘喜溢心顏榮生步武
竊念某天資至昧人品甚微拙如吐墨之魚勤類蝕書
之蠹十年太學功屢失於幾成五郡泮林身更同於歷
聘昨假鄒君之館適留吳會之區穀中之地許游繆因
志鵠戶外之屨常滿特俾升堂侵尋歲月之賒蹭蹬功
名之會猥從世祿羞負已知鼓餘勇以當方銳之師出

遺算以雪累戰之恥技已殫矣幸而得之從新進之衣冠號貴游之子弟嘶風志在雖知塞馬之還望月心驚殆有吳牛之喘徒以為貧而仕豈能擇地而安來掌市租實司津鑰坐念塵容之抗益負初心聿瞻星使之飛庶償大願伏惟某官心源卓犖才刃縱橫聳野鶴之竒姿肖石麟之異稟胸吞萬卷居有雋聲氣壓千人往無堅對未陟禁塗之要聊從使傳之榮會殿最於列城職高論秀分涇渭於羣吏任劇廉能顧惟虛薄之資夙荷

作成之賜矧於此地辱在所臨雖不能戴劍分庭干部
使者之譽或庶幾摳衣造席執門弟子之容

代人轉官賜第謝宰執啓

比膺帝睠亟進官聯仍拜賜之芝函遂登名於桂籍寵
光橫及感涕交流伏念某性昧知方才疎適變少而遊
學不能收場屋之功晚乃遭時已叨塵侍從之列荷大
鈞之曲造懼小器之疾顛每究勤劬勉圖稱塞技已窮
而難彊力弗給而易疲至如餉饋之薄勞乃是轉輸之

常職俾之增秩固慚恩數之優假以決科更使品流之
異自惟何者獨得兼之此蓋伏遇某官道濟寰區功存
廟社削除醜類既恢經武之圖旌別羣材更助右文之
化故捐殊賞以賁微軀某敢不竭節奉公推誠享上謹
邦國貢輸之備識朝廷法令之宜庶幾此心何敢云報
代謝除發運啓

誤膺詔旨陞總計權顧名位之加隆揣事功之靡稱寵
榮所逮慚懼惟并伏念某井谷地寒蜩鳩才小出遇明

良之會擢從冗散之聯寢被躡除濫當將漕雖百骸盡
瘁訖無足國之深謀而一意首公徒有愛君之大節比
更再歲遽閱三遷心已愧於超踰力方圖於稱塞更叨
異數就進崇資狎承旒宸之恩默識陶鎔之自此蓋伏
遇某官精忠冠古端行表時言為社稷之遠圖動合國
冢之大體高文碩學雅推多士之宗明德茂勲益著百
僚之望遂於踈逖亦不棄遺謂其既塵清切之班使之
增重光華之任敢不恪遵乃職期副所蒙誓畢餘生已

作報恩之計庶幾薄效不辜責實之朝

代謝轉官啓

入告元勲已誕揚於顯冊徧行殊賞乃橫及於微軀亟
被恩言徒懷感臆伏念某起從疎逖誤玷選除寢膺寵
數之過優每愧器能之弗稱頃緣移使方屬整兵峙乃
糗糧偶無餉饋之乏于彼原隰與有馳驅之勞蓋職分
之當然顧事為之安在驟叨增秩深懼罔功此蓋伏遇
某官威格華夷志存廟社憤兇徒之竊發出妙略以請

行運籌帷幄之中既空蟻聚還師衽席之上爰振虎臣
遂軫念輸將之勤亦聯名慶賜之列某敢不恪遵乃職
圖稱所知庶以奉公循理之心可為推賢與能之報

代賀翁中丞改知杭州啓

伏審拜恩中道更鎮近藩凡屬統臨交深欣畏恭以某
官才推英傑德懋中和親逢聖主之知自致風雲之會
紫荷持橐久叅帷幄之謀白簡飛章悉正朝廷之體頃
被天綸之渥暫分畫錦之榮克殄寇攘用蘇疲瘵作軍

謀帥方加責於殊功視邦選侯遂改臨於大屏定見賜
環之亟靡容開府之淹歸踐廟堂下澤寰海某繆當支
郡行託餘庥顧惟慰幸之多豈在等倫之後

代賀胡提刑啓

伏審光被帝綸寵更使節威聲所底樂誦惟均恭以某
官雅望鎮浮周才應變所至可紀有前古吏師之風無
施不宜皆一時國論所倚比奉凝旒之對式符側席之
求嘉謀適陳明命已出軺車一乘蓋欲重持斧之權細

札十行恐遂趣賜環之召顧惟晚晚辱在庀庠行拜旌
旗之光敢修竿牘之禮欣幸之劇倍萬常情

代賀張舍人啓

伏審拜恩宸陛進直掖垣休命播騰輿情欣屬伏惟某
官氣蓋一世心雄萬夫煥星斗之文追配作者起雷霆
之譽蔚為聞人有連中八科之名無紛亂諸事之誚蚤
從麟閣盡讀未見之書旋列螭坳更著不刊之典蓋善
為訓誥誓命之煩悉必能道德意志慮之精微果被顯

除遂居華選靖共一節共識傳昭之古風通達百為當
問崔琳之今事嗣觀綸綍之出趣預廟堂之游某蚤辱
論交茲聞得位上以贊朝廷之喜下預有鄉閭之榮

代賀韓舍人啓

伏審近奉制函遂登辭掖人望所屬士論為榮伏惟某
官諸儒楷模三代豪傑揚雄於蜀本著書成後世之名
馬周入關因抗章言天下之事褒語一下英聲四馳蓋
不為世俗無用之文則已識公輔有為之器其間流落

公言謂何及此選除上意決矣然以辭令贊書之任而
付討論潤色之才此優為之何足道者一時製作孰能
居蘇賈之先他日設施自當在常楊之上某預游滋久
聞命甚休睠江湖之一麾阻門闌之三賀忻懽素志倍
蓰常情

代賀宣撫啓

伏審告廷明命復位元樞嗣開幕府之嚴遽捨安車之
佚事關國體喜動民情竊以鎮撫四夷為上公之任典

護諸將乃元帥之權去就之間重輕所繫故師連西海
疆衛公之一行而寇警朔方賴長平之復出勲盟既固
史牒用光恭惟某官位冠宗工望隆元老攄尊主庇民
之志成開疆辟土之功鷹揚四方鶚立一世威稜遠憺
顧草木之皆知忠烈具存宜藜藿之不採頃緣振旅因
欲奉身上心雖憫於獨賢輿論已知其復用果承溫詔
再撫全師蓋邊陲無折箠之勞則宗社有覆盂之勢虜
謂吾父當厭難於階楹人歌我公即還師於衽席斯言

可必萬口所同某辱在播釣喜聞推轂徒以一麾而出
守莫陪十乘之啓行抃躍私情倍百常品

代賀太宰啓

伏審告廷坦制正位冢司百辟具瞻萬邦胥慶竊以歷
觀論相之重深識守文之難終寧考之圖功時方紹復
條先帝之故事自足施行乃登用於舊人以付畀於大
政務飭治體不求智名恭惟某官盛德庇民殊勲冠世
蚤收四海之聞望更練三朝之典章上所注懷從甘盤

之舊學國有決議咨方叔之壯猶直道事君正色率下
備受大國之體貌綽有故舊之風流袞職既虛巖瞻彌
峻遂定金甌之卜首居玉鉉之聯華夏系心方資霖雨
之澤措紳屬目共仰中台之明某托命洪鈞庇身支郡
逖想雲龍之會阻陪鳬藻之歡抃躍之私名言莫既

代賀少宰啓

伏審讀命路朝正儀揆席真儒登用庶類昭蘇天下幸
甚竊以聖賢之相逢本由天地之交泰為時而降非人

所能選於衆而舉臯陶雖曰疇咨之命審厥象而得傳
說是為帝賚之祥自昔傳聞於身親見恭惟某官柱石
王室股肱帝躬身繫朝廷之重輕心關宗社之休戚開
拓萬里成超今冠古之功救寧四方致尊主庇民之業
道洽政治謨明弼諧使邦朋之寢消識國是之素定遂
符夢卜進總機衡必將盡行平日之言然後散為天下
之福轉洪鈞之一氣時適純熙安泰山而四維邦其永
固某叨分郡寄迹聽除音外與驩謠慶雲龍之會中懷

美蔭賀燕雀之私抃蹈既深輸寫奚既

代潁州王待制謝執政啓

馳驛再暮偶逃吏議分符千里又玷國恩控畿甸之上
游既溪湖之勝踐過客稀少絕厨傳將迎之勞居民雅
馴無訟牒剗裁之冗筋骸就佚顏面興慙伏念某奮身
孤貧逢世熙洽偶緣奔走之薄效遂偕侍從之榮班然
最下之考累書當有餘責而至愚之慮已試實無他腸
仰荷廟堂之知俾叅禁密之籍未收績用更以名聞付

之牧養之權遂此便安之願此蓋伏遇某官佐佑真主
師保羣黎明德茂勲已躋登三王之治深謀至計更成
一六合之風旁求心膺之臣出守股肱之郡有如庸懦
亦冒選除某敢不勉勵夙宵恪修職業期稱責成之政
庶遵畫諾之規

代賀右丞啓

伏審寵拜制函進登政席四方引領百辟傾心伏惟慶
慰恭以某官學瞻儒宗才高王佐昔在隱約公輔之望

已隆久於禁嚴神聖之知益簡豈惟擅燕許之大筆居
常罄稷契之忠言天日下臨風雲交會議已馳於域外
禮遂絕於坐間立太平之基方播鈞以成萬物開衆正
之路將築館以待羣材自省微生竊叨大化懷守臣之
紱坐閱歲時掃相國之門動形夢寐依歸抃躍倍百等
夷

為戶部葉尚書回諸路使者啓

比者誤膺詔綽叨摠計庭蕃藏利弊之餘九征多闕調

度經常之外百費交興揣縣薄以奚堪冒寵榮而更懼
豈謂某官過持謙柄遠賁慶函敦意愛之周旋粲文辭
之曲折光華所照衰朽為慚念王室之孔艱倚使臺而
甚重舟車並湊方資指畫之勞門宇相望猶阻瞻承之
便感銘徒切敷敘曷殫

代謝還任啓

罪當遐棄方解組以去官恩許終更復旋轡而就事召
驚魂於一夕九升之際收渙汗於終朝三褫之餘喜動

親顏寵孚民聽荷旒宸廓乾坤之施不求其初念門牆
矜簪履之遺乃至於此捫心惕若攬涕潸然伏念某弱
植易搖驚筋難彊頃從使傳誤被詔除延閣通班假一
麾於南國故鄉在望足三釜於北堂徒黽勉於夙宵但
糜捐於歲月蓋投閒置散者分所當得而撥煩劇劇者
才豈能堪積此叨踰至於汰罷上累藏疾納汙之德中
懷省愆念咎之疑或謂他賜此所告者過也自憐孤迹
誰與改而正諸詎意台光下臨蒞屋皆照致膺申命獲

返故棲此蓋伏遇某官莊重鎮時高明拔俗英文敏識
本三代儒學之宗忠言嘉謀亦一時國論所倚居然真
輔相之器綽有賢父兄之風民皆系心上已注意殊庭
澹漠叅九華妙會之先清禁凝嚴列五閣英游之冠然
猶吐握下士寤寐招賢博收豪傑之才共佐光華之旦
就如艱拙亦在記憐務盡掩於過差使曲全於終始某
敢不堅持一節力報萬分無他技能愧承乏江海之上
不相背負誓託命鑪錘之間感激深深喻言曷既



龜谿集卷八

欽定四庫全書

集部
龜谿集卷十九

詳校官左中允_臣瑋五珠

主事_臣呂雲棟覆勘

總校官編修_臣王燕緒

校對官中書_臣吳俊

謄錄監生_臣楊兆豐

欽定四庫全書

龜谿集卷九

宋 沈與求 撰

啓

賀除畱守啓

伏審賜環亟下信節遄歸飭燕館以留居御朝端而趣
對身關國體想忘跋履之勞德享天心宜擁福釐之集
恭惟某官朝廷碩輔社稷宗臣以皋夔之才逢堯舜之
主引君當道蚤輸密勿之忠措世太平已底經綸之績

勲銘具在紀律畢張聿從真館之游乃託价藩之任申
伯之居南國雖賴蕃宣周公之詠東山終還左右及此
介圭之覲實符仄席之求諒展辰猶數膺晝接然以素
望之所屬必惟舊人之是圖竚秉國均轉洪鈞之一氣
益熙帝載平泰階之六符載念微生嘗叨異顧與燕雀
而同賀庶桃李之垂陰

問侯中書啓

伏念某猥以微生叨從未宦效九九之技曷若江湖之

濱瞻兩兩之符恍然雲漢之表顧門牆之彌峻致竿牘
之罕通引領云勞傾心則壹恭惟謀謨帝所勸相王家
順迎六氣之和茂擁三靈之祐伏以某官夙鍾間氣親
際昌辰遂以非常之才助成無競之烈發揮一德使邦
朋之寢消感繫百為由國是之先定及此精神之會應
於寤寐之求天睠孔昭民瞻允屬據百寮之上已知體
貌之崇居三事之先即俟儀刑之正上以副一人之意
下以慰四海之心更乞深念宗祊加護寢餼某卑情無

任祝頌虔切之至

賀漕使加職啓

伏審顯膺徽數寵進崇資凡託庇庥舉深欣屬恭以某
官存心甚遠養氣至剛亮節端誠實表儀於當世危言
鯁論皆根本於生民不圖近功可贊大事情愚民之冒
昧連狡寇之猖狂爰飭使軺式嚴師律九攻九拒多自
於指蹤萬舉萬全豈容其假息至於轉餉曾不乏供果
消南顧之憂遂躡西清之秩策勲方茂第賞惟新觀賜

札之系傳知召環之狎至退惟陋質叨沐餘光承命之初為喜益倍

謝薦舉啓

課功無狀偶逃大吏之譴訶進秩有階忽冒上臣之薦籍過形褻字加賁沈蹤顧塞責之靡遑唯銜恩而獨至竊以聖人以學而成俗是為教化之原儒者以道而得民非若簿書之比故於州縣之職莫先庠序之聯雖列處侯邦第使視漕於幕府而選從帝學更令通籍於橋

門至煩一代之宗師並舉四方之寒畯號曰吾屬收為
已知然而泮水泛居或類河中之木需章典奏必蒐席
上之珍宜得魁壘軒昂之才加以疏通該洽之識名實
四達言行兩純使之無遺庶云有補如某者天資昏惰
人品羈單少也讀書徒粗知於為已長而干祿蓋苟求
於及親以應俗多老生之常談而經世乏古人之大節
長恐沒齒分為散材乃霑黃甲之恩漸免白丁之役及
補郡吏復居校官設施皆熟於平時游處既多於暇日

稍尋黃卷轉授青衿必有我師雖欲從其善者此非子
座豈待請而避之跡未至於顛隳心已慚於忝冒方期
斥去遽辱名聞此蓋伏遇某官提衡九流推轂多士小
德役大德每蹈孟軻之言先知覺後知將成伊尹之志
遂以丹青之定價勉茲白社之寒生不間庸愚亦加采
錄顧矜憐之若此嘆報効之云何某敢不增所未長鞭
其不及駕馬十駕庶申伏櫪之悲敝帚千金終發掃門
之喜

謝運使差權知縣事啓

恭承郵報俾攝縣章調宓令之琴馬知政理擁毛生之
檄聊遂親謀蒙幸有餘包羞無所伏念某嶽嶽可笑約
結亡竒懵學難成顧短檠而自媿薄游寡偶撫長鋏以
誰憐栖遲太學之十年竊取奉常之一第尚須官次伏
處鄉邦誰是餽漿之人空餘乞米之帖茲因弭節方獲
曳裾擢於田里之中寘在門牆之末公移遠逮就假一
雷之封疾置驚傳親著五雲之字顧惟凡瑣乃爾遭逢

此蓋某官遠業濟時高風勵俗裕民足國已操邦計之
羸擇德量能更欲人材之當故令散吏輒補曠官某敢
不勉盡所長以待乃事體一日葺居之戒寧憚小勞臻
五月報政之期庶收微效

問候運使啓

嚮自揚舲督府引襟行臺濫從俎豆之間數奉珪璋之
表竭來敝邑阻拜前塵緬惟規略之餘休有神明之相
恭以某官望隆當世行配古人才地有餘雖多多而倚

辨辭源無極猶戛戛以知難言皆合於上心動必關於
國體暫屈經綸之手遂恢富足之原言聽計行實逢千
載之會家給人足更邁九年之儲柄用可期師瞻已峻
更乞上為宗祏加護寢興某下情無任祈嚮依歸之至

新令遠迎啟

伏審某官比膺芝綽屈領銅章調宓令之琴行觀美政
整王喬之舄共仰仙風退念飄蓬之餘空懷揚舡之懼
承顏之幸翹足以須

賀毛給事啓

伏審溫綸亟下大旆遄歸騰聞四方聳動羣聽竊以殿
中獻納之地是為門下論駁之司非風節梗槩則不足
以典樞機非論議該通則不足以承顧問故揚雄於漢
擢先待詔之聯而李藩在唐望隆批勅之手得人如此
視古庶幾恭惟某官學為儒宗才配人傑持心耿介壓
嵩岱而不移蘊量恢閎包滄溟而無際炳文章之光焰
極師友之淵源名蓋一時用先諸老徐堅真舍人樣蚤

擅中朝望之實宰相才聊從外補席方及煖政已報成
紫泥俄見於賜環青瑣復叅於持橐想金甌之久覆指
玉鉉以旋登公論所期斯言可必某繆從末路景仰英
風茲聞明命之頒彌激懦衷之喜榆枋斥鷃敢知鵬運
之高庭戶飛蠅但欲驥程之遠依歸抃躍倍百等倫

賀賈舍人啓

伏審茂膺詔檢寵進詞垣聯侍從之榮班極文章之盛
選音騰疾置光動故鄉恭以某官學配古人才高當世

早馳妙譽擅滄海之遺珠獨冠賢科應崑山之片玉用
光諸老擢自一人校讎兼六籍之微刊正盡羣言之失
踐揚滋久聞望益隆進直螭坳記載之功唯允首陪鷄
戟調護之德攸全爰從禮樂之司入掌絲綸之地舍人
樣有如此大手筆無甚難紅藥栽詩暢中和之遠韻紫
微草詔追顥噩之醇風紹蘇賈之才名超伊管之相業
乃符輿論亦出家聲某蹤跡陸沈音塵斗曠側聞成命
之出彌增末契之榮目想俊游輒起彈冠之興心懷美

廕尤傾賀厦之誠

謝改差常州學官啓

問塗湘水方懷陟屺之思易地蘭陵復預采芹之樂幸
既安於子職喜遂發於親顏揣分云優循涯以愧伏念
某天資樸昧人品羈單妄刻意於詩書旋躡蹤於衿佩
一隨計牒九換年華崧韭春秋屢動故園之興齋鹽朝
暮貪觀上國之光偶脫白丁遽聯黃甲洎親榮三釜之
祿飾身叨五兩之綸謂寸進之可期宜分陰之亦競而

乃赴銓十月補吏一涯取道重江念毛生之檄徒捧待
期荐歲顧墨子之突未黔敢圖小物之私曲綴大賢之
念達籲天之危悃遂擇地之初心訖使便安盡從願欲
茲蓋某官恩深幬載德懋變調推大鈞之無垠衆由平
進謂小人之有母獨軫深慈便菽水之奉於近鄉脫風
波之危於遠役矜憐若此報稱云何某敢不激昂其衷
砥礪所學庭闈愛日已寬遲暮之懷庠序承風益廣朋
游之樂

賀馮承旨啓

伏審鋒車入覲斧宸對揚超玉筍之新班冠金鑾之舊直除音四出歡頌一時竊以舉三代之遺英而當號令文章之事取四海之雋望而摠言語侍從之官此上所篤於近臣而世亦將期以大用况夫親承密旨獨望清光地接六符之中階秩高兩禁之上列帝選于衆公惟其人恭惟某官炳嶽瀆之靈盡東南之美德量蓋存夫遠大道術已造於純全氣警九州繇直養而無害才

周萬事殆曲成而不遺忠既格於天淵信亦行於蠻貊
晝膺三接歲閱九遷詞掖代言思若湧泉之決儒宮正
席化如時雨之施騰聞東序之絃歌歸聽北扉之鈴索
方將攄尊主庇民之術豈特煥經天緯地之文遽銜恤
於倚廬致興思於仄席聿頒召節仍趣賜環天子虛懷
安問鬼神之所以都人拭目復觀風采之凜然迨出親
除式昭異數定見金甌之覆卽期玉鉉之登德裕之文
用雖長於大手吉甫既相禮自絕於同僚斯言不誣惟

日以俟某離奇弱質么麼微生頃蒙特達之知曾乏先容之助側聞顯渥倍激驩悰久託範模行費大鈞之塊
坵僅同燕雀更欣夏屋之幬幪

賀新守盛學士啓

伏審細札疏恩左符分命起自列僊之館來臨多士之鄉芹藻生輝布韋增氣恭以某官剛明蓄德端厚凝姿粲然星斗之文粹矣圭璋之表賢關濶步早收俊造之科仕路橫翔遂入英雄之彀乘軺擅膚使之譽列棘聳

名卿之稱醞藉有餘於風流緣飾無先於儒雅一昨辭
榮北闕均逸南州田里絕歎息之聲治功藹著庠序脩
孝弟之義名教勃興集此美談發於遺愛况蘭陵之孔
道接茗水之上游喬木相望稔服善鄰之教令甘棠具
在飫聞雅俗之歌謠用是此邦絃誦之徒思見我公色
笑之樂茲聞除目實激懽悰顧惟齋鹽之冷官曾是門
闌之下客燕雀相賀同看大厦之蔭成桃李方華獨認
舊蹊之路穩依歸扑躍倍萬等倫

賀盧左司啓

伏審祇承嚴召亟被峻除顯陟中臺之端榮居上宰之
屬音騰郵置驩動搢紳竊以尚書會萬事之本元左司
貳六曹之綱轄所以抗議軒陛叅謀廟堂因唐建官始
重都公之號迨宋稽古實為法從之儲惟慎簡求豈輕
除授恭以某官氣壓萬象心潛九流本師友之淵源發
文章之光焰出符國瑞同威鳳之九苞居協地靈配元
龜之五摠爰自早歲竭來上都勃焉起三俊之名凜然

歸四海之望既橫翔於雄構遂獨步於英躔絳帳談經
咸意鼎來之學赤裳賦命遽詠遄歸之詩方追臺妙之
游復領使華之寄雖登車之志遠念側席之恩深是宜
趣還庸副虛佇欲知相業試觀省闈之彌綸行慶帝俞
即步禁塗之清切自顧門闌之下客曾塵衡石之上游
黃緣蕪辭竊取英眄喜樂正之好善亦既有餘謂公叔
之為文豈能無望

賀毛顯謨知鎮江府啓

伏審某官懇辭清禁榮統要藩嚴助懷歸本厭承明之
直蕭傅復出蓋觀宰相之材唯其被寵光而益新所以
全譽處而彌固有識相慶不謀同詞恭以某官望重吏
師學深王佐秋陽江漢會道術於環中景星鳳凰聳德
名於天下勁氣發後凋之操沈謀迎先見之幾忠無他
腸才有餘地視文章之小技素所優為舉節義之大閑
方將獨立笑曲士之未徧為賢者之不能故於用舍重
輕之間以見進退難易之際抗章避寵奏屢卻而復前

褒詔賜俞意重違而愈厚訖從荷橐爰假竹符峻祕職
於西清委良翰於南國明哲具美既歌山甫之遄歸治
行騰聞即慶弱翁之大用某承顏雖晚受顧則深初聆
謦欬之音已荷齒牙之論竊冒叢雲之蔭更許包蒙默
希霖雨之恩終期振槁

賀正啓

月窮於紀方占嗣歲之祥星回於天遂履初元之吉維
世巨哲實享純釐恭惟某官正色立朝虛已游世功名

自致早親日月之光節義獨高更勵冰霜之操對越三陽之序導迎六氣之和即擁春祺入熙帝載某逖違恩闕阻奉壽觴瞻頌惟勤名言曷喻

同前

上同
維時舊弼實享繁釐恭惟某官道濟寰區功存廟社陶鈞獨運早陪黃閣之游鼎鼐再調終慰蒼生之望對越三陽之序導迎六氣之和即擁春祺入扶帝祚某跼回末路坐遠崇闕阻稱椒柏之觴遙薦松椿之壽瞻

祈是切敷敝曷周

謝祭酒舉改官啓

飛章帝所推華袞一字之褒傳檄儒宮增敝帚千金之
享載惟忝冒采積驚慚竊以知人之道固難而儒術非
他技之比入仕之流寢廣而學校乃公議所歸至於宗
師之薦論必繫朝廷之簡拔秩六百石徑脫州縣之冗
曹歲四十員盡收雍泮之清選專以蒐羅一時寒畯之
士因以激昂三代豪傑之風凡舉所知必從其類故竿

牘小夫之智至無所容簿書俗吏之為略而弗取自非
文章炳蔚問學淹通望實有加於人行能無媿於古則
何以酬丹霄之定價附青雲以垂名如某者藝畹寒茲
辭源淺派所學真土梗耳弗造本根於道猶醢鷄歟未
離幽薊頃聯黃甲偶代白丁既預搢紳之游即分庠序
之教歎齋鹽於朝暮寧逃獨冷之譏閱絃誦於春秋粗
知三樂之趣技殫鼯鼠化止奔蜂方幽黜之是虞曷明
揚之遽及平生慕願此日遭逢茲蓋某官推輓九流括

囊六藝自任斯文之興廢獨為吾道之重輕先知覺後
知於身親見小德役大德與時偕行乃睹微蹤嘗叨異
盼終未忘於下體遂不壅於上聞芹藻預榮蓬華增氣
某敢不恪遵師法慎守官箴節勵冰霜必欲免夏畦之
病光分螢爝或能助秋陽之明

謝蔣迪功啓

伏審首被貢書遂偕計牒膠庠倚重黨友增華貢元某
官杞梓奇材芝蘭秀質藉甚家聲之振藹然世德之昌

黃卷一經得賢父兄之樂青衫九品從貴子弟之游初
接迹於羣居已程能於異等迨膺妙選實愜衆情縱步
武於夷塗可立待也收功名於絕會是以似之方深贊
喜之誠繆辱飛文之貺銘藏惟切敷述奚殫

賀盧舍人啓

伏審近膺制檢遂陟詞垣入陪清禁之塗允屬鴻儒之
任權輿廊廟鼓舞搢紳恭以某官如唐一夔為宋三儁
講奪重席蓋國中之真儒談傾四筵亦天下之辯士文

章有古之風烈德行為時之表儀素望藹然英聲藉甚
上所屬意見謂有宰相才民亦系心何止為舍人樣茲
假判花之重以叅視草之榮政事預聞允資國體之通
達訓詞具在共期帝制之坦明洪惟二者之長信謂一
時之美方將日膺三接歲閱九遷亟躋玉筍之班即進
金鑾之直斯言可必指日以期某受恩特深為喜益倍
燕雀相賀初瞻大廈之蔭成桃李不言自識舊蹊之路
穩

賀周司業啓

伏審被恩宸宸正位學宮凡在下風孰不同慶恭以某
官自天仙伯為世儒宗學貫九流獨脫拘攣之見文備
衆體雅好深湛之思論不詭於聖人達可行之天下確
乎不拔閤然而章鐵心石腸素蘊功名之志金口木舌
豈惟誦說之才選自郎闈登此師帳誠恐明綸之出不
煩重席之溫趣據要津庸副清議某伏自早歲即聞大
名因緣繫下之棄材出入彀中之餘地蹉跎一命契濶

七年身繫寒鄉徒有修門之夢心懷美蔭莫陪廣廈之游

賀林資政除南京啓

側聞休命就起宗工還祕殿之崇資委陪京之重寄恩
言誕布僉論交孚恭以某官受天全材為帝良弼韜文
武之兩器秉忠孝之一心氣貫堪輿繇直養而無害智
窮眇忽皆曲成而不遺勲名具存風采可想雖讒波之
橫起而天鑒之孔昭曾無淹時遽有徽數欲付倚平之

任姑煩釐尹之行塊北大鈞行歸浴鳳之沼鬱葱佳氣
況鄰飛鷁之都定觀麻檢之頒即對衮衣之寵多士之
願斯民所同某受知特深為喜益倍屬吏曹之有守趨
賓列以無階

謝薦舉啓

賢舍空餐久竊養賢之鼎輜軒過聽誤登薦士之書自
顧何堪人以為幸竊以汲引之重今古所同取夫拔茅
宜在泰通之世譬之推轂當遵平陸之塗豈唯卿士之

舉能抑亦王公之借譽不在此族則為匪人而况摠一道之詢謀會列城之殿最按廉既廣簡核惟精必得異才乃副公舉如某者江湖漫士蓬華寒生斷斷他技之倚無錄錄奇節之未有短檠徒對口耳之學易窮長缺空彈齒牙之論安在詎意車中之半面尚矜堂下之一言略其迂愚賜之翦拂此蓋某官識先致遠量極包蒙事君以人自得上臣之體與人為善獨高君子之風兼收尺寸之長靡有錙銖之失推其餘地庇此微蹤某敢

不力跂前修誓圖後效俯稱鄉人之好仰酬國士之知
賀毛顯謨除真定帥啓

伏審近奉帝綸就更戎幄輟西清之密侍紓北顧之深
憂先聲所馳羣醜攸讐恭以某官公輔之望蓋自少時
將帥之才乃其餘事徒以詩書之府形為文武之韜凜
然堂上之奇兵威加草木邃矣幕中之婉畫名動蠻夷
暫分清禁之光以壯朔方之勢然而非為一面之病骨
乃四支之彊賢人入朝勅敵何算果吾父也尊俎可以

銷萌以我公兮鼎鉉待而增重行因入覲遂即登庸某
早伏下風近叨殊盼許其氣類之比借以品題之私望
元戎之啓行心隨目斷嗟太史之留滯力與命違

賀盧給事啓

伏審比繇西省進直東臺帝恩所加士論增重竊以凡
號法從均游禁塗獨於青瑣之崇資叅用黃門之故事
辯駁邪正彈訶同烏府之嚴論議古今顧問亞貂冠之
峻欬稱是職必惟其人恭以某官如古天民為時人傑

學洞九流之邃文追六籍之醇字韻獨高忠忱素著如
璞玉渾金而莫能名其器於盤根錯節而有以見其才
神具聽其靖共世固知其久大果膺殊矚遂陟近班職
在掌綸已擅舍人之樣任當批勅更繼夕郎之風固非
一日而得君是宜旬月而取相行聞大用實副僉言某
繆荷深知本緣末技側聽鵬搏之迅彌增蠅附之榮抃
躍依歸倍萬等倫

賀黃司成啓

伏審近膺帝制遂正儒宗多士聳觀豈特膠庠之矜式
四方同慶茲為廊廟之權輿凡託恩庥共深欣屬恭惟
某官望隆王佐名重世師德行配先民之純文章祛後
學之弊取武城二三策雅謂知言得商頌十二篇蚤推
能賦恢然凝遠之度邃矣深湛之思有往皆成無施不
可上所注意尤知山甫之小心民皆具瞻已必弱翁之
大用果叅法從進直掖垣亟由鳳閣之近班來處鱣堂
之故地回瞻僚吏盡四海之淵源追數游從信一時之

豪傑斯文有託吾道益尊木鐸之任既優金鉉之除伊
邇進北扉而承密旨綽有前規開東閣而館翹材佇觀
殊渥某夤緣姻婭出入門闥自跼迹於末塗阻承顏於
隅坐側聆休命倍激懼悚

賀湖守葛待制啓

比審高牙已臨大府寬條一出驪頌四馳恭以某官心
存古人氣蓋當世名號一時之豪傑學為四海之宗師
兩禁同游最先德舉八科並重豈止文鳴上心雅欲其

居中時論久嗟於補外然公卿皆憚徒以馬嚴之立朝而吏民不欺亦賴長公之治郡遂請便安之地用蘇疲瘵之氓正恐賜環不容煖席某頃由絃誦獲進門牆服在下陳方執簿書之役瞻言故國莫修桑梓之恭依嚮之誠倍萬常品

賀盛守再任啓

伏審祇奉新恩荐臨舊治提封所暨驩頌如初恭以某官卓犖受才洪深迪德道義滿於天下英雄游於彀中

煥星斗之文追古作者起雷霆之譽為時聞人功有為
以皆成治無施而不可輟從棘寺出領竹符千里興謠
坐見流亡之復暮年報政騰聞課最之優妙達睿聰併
崇徽數稍緩韓侯之入覲姑徇冠恂之借留善政流風
民自安於教令深謀至計帝亦俟於咨詢會有追鋒不
容煖席顧惟疎賤叨辱知憐方懷勿翦之思更勵必恭
之戒依歸下悃倍百常情

龜谿集卷九

欽定四庫全書

龜谿集卷十

宋 沈與求 撰

啓 狀附

謝運使胡修撰舉改官啓

浮沈州縣甘老簿書出入門牆誤綠翰墨更借攀援之
勢遂成汲引之恩投足知歸撫心懷感伏念某江湖一
介塵土半生叔夜粗疎顧豈堪於作吏次山浪漫蓋已
嬾於為官未能成洗耳之圖不免效折腰之態庸庸備

位職號馬曹累累隨行事同牛走念是非之相亂致力
命之兩疑借曰自媒正使誰譽比因修小記室之問乃
得望大君子之光盼睽所加過為衆中之異聽聞或誤
遽忘名下之虛公賜品題曲為道地意極丘山之重言
逾布帛之溫退省空疎豈能稱塞茲蓋伏遇某官權衡
一世水鏡九流發為月旦之評動合春秋之法敝帚無
用提攜遂享於千金駑馬有知鞭策更勤於十駕不忘
委瑣亦玷揄揚某敢不欽誦格言勉圖薄效許以操修

加慎當遵節義之大閑謂其學問過優敢銜文章之小技庶幾激勵毋辱知憐

賀年啓

星回嗣歲月旅上春適三陽之類升宜五福之交會恭惟某官政先平易德懋中和徧歷劇煩煥若凝冰之釋一蘇疲瘵煖然挾纊之溫對越令辰受時純嘏遂被疇咨之命式登光輔之聯某心系門牆身迷州縣舉賀觴而莫及削慶牘以徒勤

謝秀守苗郎中舉改官啓

二紀服儒猶念呻吟之舊一官書獄豈堪流落之餘遽
辱提擢重為榮耀伏念某受生多難涉世少徒偶從鍾
鬴之謀輒污軒裳之列銜玉賈石夫豈本心乞酒得漿
亦其定分亟捨絃歌之樂驟親敲扑之煩羣言譎譎爭
沮幕中之辯獨行踽踽敢矜席上之珍乃使挂需頭之
章終免為搖尾之態靜言特達重愧空疎此蓋伏遇某
官隱德在時深忠許國牧人馭衆共師循吏之風流推

賢與能自得上臣之識度優容寒素曲賜獎成某敢不
銘肌感恩刻意為善庸庸末學儻有見於施為斷斷餘
生庶無忘於報稱

謝運使王待制舉改官啓

三語就掾亟從幕府之趨一字興褰輒累公車之薦荷
恩已過揣分奚勝伏念某濩落散材嬖跼蹇足貧交易
厭揖窮鬼而告行拙迹難安拜天孫而請禱念兩求之
皆失歎百慮之相攻髮已星星心徒炯炯一昨汰從黷

舍還綴銓曹路隔九霄豈有修門之夢家存四壁未成
下澤之游挫針資餬口之謀束帶效折腰之役當塗知
已或似寒蟬末路依人空慚社燕幸遘褰帷之始喜形
傾蓋之餘召置門牆使操翰墨然員多闕少時方會於
省官而親老家貧勢固難於擇祿竭來書獄聊以代耕
蓋由剡列之私既適便安之願更煩汲引彌見矜憐此
蓋伏遇某官盛德容愚通才應變以成室屋兼收棖闡
扃楔之微可羞王公近采蘋蘩溫藻之賤故雖沈於下

列亦不壅於上聞加惠寒生增榮孤宦某敢不希蹤先
列抗志後陳抱槩磨鉛期不易儒者之事飲冰食蘗庶
無負門下之知

賀提刑啓

伏審奉承溫詔臨按祥刑瞻擁傳之星馳知屬城之風
靡餘光所屬驩意已孚恭惟某官蘊識疏明懷才敏達
溢為政事曾不愧於古人著在謀謨皆可行之天下及
被承顏之寵遂紓造膝之私親被上恩就更使命威聲

所徹但聞草木之知氛祲一消無復狐狸之問恐未遑
於煖席遂已趣於賜環退省孤蹤獲歸餘芘萬事不理
行賴於多聞六轡既均庶陪於後列欣榮之至敷敘曷

周

賀沈狀元啓

伏審奉大庭之對擢居多士之先讎祕府之書進列羣
仙之右寵踰疇昔聲振縣區恭惟驩慶竊以國家數路
設科三歲下詔豈特循祖宗之法蓋將收豪傑之才紛

然朋來至以萬計蔚為首選固多異人曾未有夢兆一
飛恩加再見家聲踵復襲兩世之青氊宸藻親裊煥九
天之丹檢付以圖書之職示為翰墨之儲名雖先登事
豈前比伏惟某官文備衆體學總百家節槩軒昂鬱鬱
棟梁之氣見聞淹洽滔滔江漢之流蚤也從四方之游
固已擅一時之譽竭來文陛獨冠英躔上興見晚之嗟
士有先覩之快蓬山芸閣之直何足道哉金鑾玉堂之
除可立待也某沈迷簿領荏苒歲時未敢騰書輕為贊

喜之禮乃蒙削牘曲致撫謙之詞媿感既深名言罔既

賀左丞啓

伏審天綽疏恩台躔進次正泰階六符之象冠文昌八
座之聯成命下傳善類相慶恭惟某官三代豪傑一時
宗師夙懷經濟之圖深達彌綸之體晉公德望孰不問
年齡之幾何賈傅才名豈止對鬼神之所以智略輻湊
風采想聞自登政席之崇彌見勲盟之著九夷通道綽
有成功三后協心舉無異議乃就升於左轄以增重於

中臺帝眷既隆臣鄰益峻某登門最舊受顧已深聞天上之除音殆將起舞記日邊之歸路正復坐馳抃躍之私輸寫難盡

賀張狀元啓

伏以法駕親巡不廢詳延之問紛袍族議已推絕類之才乃下臚傳果先科列伏惟慶慰恭以某官躬行篤實資稟魁閎久於湮淪獨高鄉曲之譽素所蓄積綽有廊廟之謀一朝遂冠於英豪諸老盡驚其剴切莫可尚已

夫豈偶然主上痛悼往圖渴聞至論以為飲食嘗膽之日必有痛哭流涕之言特下詔音專求讜直禦戎三策殆興見晚之嗟寤主一言孰先慎獨之戒方將摠發舊學踐履亨塗庶幾寫平生憂國之心何止為今日決科之具屬茲晚歲竊伏下風未遑柔翰之修先辱珍函之貺感銘丹臆倍蓰常情

賀凌先輩啓

伏審奉承大對擢置上科拜命赤墀猶亞一龍之首題

名翠琰遂居千佛之先用吉士乃邦家之光納讜言真
社稷之福未遑馳問遽辱飛牋感愧之深敷宣罔既

謝黃子虛學士啓

伏審比膺詔旨追寵諫章黨石刊名忠節凜於當代書
林進秩恩光溢於暮年幽憤既申勝流相慶伏惟某官
仁言利溥義勇氣充蓋萬折而必東雖三已而無愠白
日一照伯魚何辯於前誣高風四馳叔向自全於遺直
時方挽於變亂上益思於典刑佇聞追鋒來副仄席眷

言官學久預交游邂逅公朝舉揚正論喜極阻修於柔翰謙撫亟貺於珍函感愧之深名言罔既

謝曾顯謨啓

比者徧塵三院久污紀綱之思進總一臺忽玷絲綸之命莫遂循牆之避更增據蒺之憂冒寵益深負慝彌重上意開納知犯顏逆指之非難國步阽危念疾首痛心而何補敢謂隆謙之眷過形褒大之詞披繹再三驚慚倍百此蓋某官多聞守約汎愛親仁緇衣好賢之誠德

配先正青箱傳世之學名滿諸儒特煩揮翰之懃加賁
登門之舊規存麗藻感發懦衷銘鏤之私敷陳曷既

賀趙叅政啓

伏審進登舊弼叅總繁機命下九天驪騰萬宇竊惟自
古禍亂之國必生希世豪傑之才因時作興與民休息
臨巨川而未濟方俟舟航扶大厦之將傾必資柱石副
上此意非公而誰伏惟某官誠格天淵忠存廟社方嚴
足以斷大事靜重足以經遠猷直道而行獨立不懼蹇

塞王臣之節更變故而彌堅赫赫師尹之瞻遭讒邪而益著擠之劇地凜然威名是致未央興夜半之思長安指日邊之路迨膺出綽不俟解鞍見管夷吾誰復效楚囚之泣用范武子自然知晉盜之奔爭覩設施預期戡定豈特疲民之引領是為善類之傾心矧此孤蹤嘗叨異盼方念一麾而去國未能三賀以登門抃躍私誠倍萬常品

知鎮江與戶部姚侍郎先狀

比者誤膺明命寵付便藩顧衰病之無庸豈堪煩劇賴
知憐之有素遂託庇存即獲叅承倍增欣抃

知鎮江通用謝狀

比者忽膺明命寵付便藩收迹山林之間方圖屏伏從
事干戈之際豈克堪任揣分知難冒榮為懼此蓋某官
推心忠厚迪行端良借餘論以噓枯致誤恩之起廢更
蒙珍翰用責孤蹤感愧之私敷陳罔既

知鎮江與韓帥先狀

此者誤膺明命寵付便藩久伏山林之間豈堪煩劇仰
託節旄之下庶獲庇存屬鞬將謁於轅門削牘敢塵於
記室依歸之素敷敝曷殫

知鎮江回人賀啓

比者忽膺明命寵付便藩收迹林泉之間方圖屏伏從
事干戈之際豈克堪任揣分知難冒榮為懼此蓋某官
壯猷排難雅量包荒借餘論以噓枯致誤恩之起廢江
山如故方從仁里之游雉堞相望更託善鄰之庇特貽

珍翰益賁孤蹤

知鎮江府到任謝宰執啓

起之間館付以名城井邑丘墟未變創殘之俗江山襟帶猶為形勝之區宿師方折於遐衝謀帥乃推於庸品才雖靡稱恩則有歸此蓋伏遇某官柱石邦圖著龜國論以一夫不獲為重任以四方未靖為深憂雅量鎮浮屹立中朝之望元功定難力摧外敵之鋒蓋將扶大厦之顛故盡掩羣材之短遂令駑鈍亦累埏鎔既奔命以

之官庶收功而塞責然某衰羸多病徧急少思方當調發之煩未免催科之拙願寬銜勒覲脫簡書不失朝廷勞來之方是為門閭收錄之報

問候劉帥啓

印紱相承猶接典刑之舊旌旗旁列遂依節制之雄嚮風方跂於前塵蒙霧自霑於餘潤願修竿牘少罄情悰伏惟某官韜略承家勲庸許國威望聳傳於四裔忠誠簡在於九重行總全師往清方夏平時外敵素知李廣

之無雙即日中興必倚汾陽為第一是為社稷之衛宜
擁神靈之休更冀妙嗇天和允答人望邇詠之切敷敘
曷殫

除尚書回人賀啓

起頌州麾未聞治狀趣還朝著忽拜召音仰蒙簡記之
恩俯念衰羸之質輒嘗引疾庶欲投閒成命莫回預積
曠瘼之懼移書遽及過形褻借之私感愧之深敷宣罔
既

回孟叅政啓

羽檄上聞驚干戈之遽起鑾輿順動總貔貅以親征宸
謨悉出於萬全士氣殆逾於百倍符堅之寇淝水聊與
周旋佛狸之死卯年必期犇潰迨其卻走舉協初謀此
蓋某官識際天人心存社稷叅籌帷之祕資經遠之壯
圖總留鑰之嚴倚居中之夙望致敵鋒之屢挫知國步
之永安某猥以微才濫叨近列負橐鞬而扈趨奉引何
功擁被篲以造門趨承甚邇餘寒在候珍嗇是祈

謝席叅政啓

比者叨奉制綸擢陪政路屬四郊多壘之際贊一日冀
幾之繁薄技奚施嘗循牆而避命俞音既嗇終據疾以
拜恩縣力弗勝醜顏安寄此蓋某官宅心忠恕迪德謙
虛延譽當朝每託吹噓之末論交晚歲更親矩矱之餘
遂致微蹤遽膺重任辱賀緘之彌渥攄感臆以徒深銘
鏤之私數陳曷既

謝前宰執啓

比者叨奉制綸擢陪政路屬四郊多壘之際贊一日萬幾之繁薄技奚施嘗循牆而瀝懇俞音既嗇終據疾以拜恩伏念某學昧通方才疎適變偶以片言之合驟蒙上聖之知念人物之眇然誰不如已處廊廟則駭矣人其謂何汗號莫回覲顏安寄茲蓋伏遇某官柱石王室股肱帝躬宏濟艱難務兼收於羣策旁招俊乂圖並輯於庶功藐是孤蹤越從下列即託埏鎔之末親聞矩矱之餘訖致妄庸誤膺光寵中存丹赤徒知當勉於夙宵

外竭罷駕誠恐莫裨於塵露感銘之切敷敘曷周

謝劉宣撫啓

竊以羽檄四馳遽音日至天戈一指醜類宵奔成宗社莫
大之勲振朝廷久衰之氣威行塞外騷動區中伏惟某
官躬受傑才世資雄略吳漢若一敵國屢張鷟鸛之鋒
嫖姚比再冠軍益整貔貅之旅屬茲逆寇挾彼援師深
入兩淮之間相持三月之久仰繫勝筭盡伐狡謀曾無
亡矢遺鏃之虞每有折馘執俘之捷苻堅之寇淝水聊

與周旋佛狸之死卯年果聞潛遁顧外敵之已卻諒中
興之所基草木類人旌旗動色功存萬世方將固山河
之盟位列上孤豈特聳干戈之衛自惟晚歲獲與殊休
喜忭之私敷陳罔既

回汪相公啓

竊以門牆負阻莫瞻華袞之尊使介俯臨荐辱珍函之
寵退惟固陋渠敢奉承伏惟某官社稷元勳朝廷舊德
屬上聖龍飛之日會中原雲擾之辰首定大橫之占克

扶漢祚將啓中興之運復振周宗既攄經濟之謀聊遂
燕閒之樂收四方之能事每欲從赤松之遊明一士之
宿寃獨追恨伯仁之死雖春秋責備於賢者然禮義何
恤於人言過形引咎之詞彌見執謙之意載深紬繹倍
切感銘春律寢暄琳宮多暇願精調於鼎食益加衛於
寢興

回知福州張叅政啓

伏審祗膺休命顯答茂功陞祕殿之隆名增价藩之勝

勢伏惟慶慰恭以某官鉅才周變厚德鎮浮入與政塗
活國之謀具在出分戎閫干城之略益昭蓋身自任於
安危故心每關於休戚屬時逆黨挾彼彊鄰遽涉地以
深侵擬投鞭而徑渡天臨萬騎至煩鑾輅之親征雲集
千艘卒賴樓船之為助況委輸之狎至加籌策之上陳
迨此班師宜先懋賞韓滉濟陝郊之餉絕驩動六軍常
袞報閩嶠之政成寵歸三事顧嚮風之逾切辱流問之
過勤感策滋深名言罔既

回李觀文啓

伏審誕膺明命茂對閔休冠書殿之班聯正台司之體
貌丕昭異數允協具瞻伏惟驩慰恭以某官盛德格天
傑才經世凜凜公輔之望身退而道愈尊堂堂社稷之
勲時危而節益著雖綠野遂晉公之樂而蒼生思謝傅
之歸曾謂衆非尚勝多口日月在上風雨不渝塞翁之
馬自還田者之牛安在坐復青壇之舊於我何加行歸
黃閣之崇斯言可必某猥叅近列遠映餘輝阻修賀燕

之儀驟獲烹魚之素仰慚謙眷俯劇悸悚感佩之私敷
宣罔既

賀孟觀文啓

伏審抗章宸極得請輔藩伏惟驩慰恭以某官亮節端
朝純誠翊世有開濟之才以戡多難有深厚之德以鎮
羣浮叅幹萬幾備更六載顧勲勞之克著宜風采之聳
聞楚粵塵清雖已掃潢池之習關河霧塞猶未奠神州
之居方倚老成庶圖恢復遽辭榮於右府暫分命於左

符書殿絕班邈連霄漢蓬山傑觀近隔濤江想偃旆之
未遑恐賜環之已下退惟孤拙夙荷庇庥悵會合之多
乖欽出處之全美依歸徒切敷敘曷周

謝送生日詩狀

伏蒙都騎見存大篇為貺曲記劬勞之日過形褒頌之
詞伏讀嘉言敢忘重拜占斯干之吉夢愧此餘生誦汝
墳之卒章居然永歎感銘之至敷敘曷周

回路樞密謝復職啓

伏審祇拜渥恩寵還峻職搢紳胥穆表著用光恭惟某
官德懋儀形志先康濟歷艱難之多變恃直亮之一心
越秉鴻樞居存勝算辰猶克壯將枕戈以立功名晝接
方隆忽解組而辭富貴雖綠野之居甚樂然蒼生之望
彌深比下明綸進聯祕殿蓋謂孔戣之去理或未宜必
知季子之歸時乎有待尚阻瞻承之幸過蒙問勞之勤
感佩滋多名言曷既

回折樞密啓

伏審進儀帷幄叅幹樞機圖國步之救寧孰堪大任契
上心之簡在自屬真賢郵音播傳輿論欣穆恭惟某官
才兼文武學際天人亮節孤風名素高於當世深謀至
計志每切於生民自頃來歸即期登用數奉凝旒之對
果膺虛席之求孔明之卧隆中身嘗不屈夷吾之在江
左人以無憂必將發揮平日欲行之言用能經營方今
未畢之事衆口所必斯言不誣退省衰蹤久叨末契甫
投閒於鄉社實託庇於門闌依鄉采勤輸寫難既

轉官許回授與兄謝宰執啓

庀職無功叨被公朝之寵抗章有請願為私室之營仰承出綽之恩俯慰陟岡之念兄弟感泣父老歎咨伏念某起家寒微涉世迂濶進踰涯分自貽滿溢之虞退省愆違猶負顛隳之懼至若成書之奏御固已乞身而去朝敢謂第名例蒙盼賞念事為之靡稱控懇避而莫諧爰念急難冒陳迫切雨露之澤既霑被於同根雲漢之章復表揚於異數夫何倣倖有此遭逢茲蓋伏遇某官

直道事君誠心好善性淳孝友用風勸於多方身任安危將日新於庶治過蒙矜惻迺獲褻俞方收迹於山樊第歸恩於陶冶銘鏤之至敷敘曷周

賀張叅政啓

伏審進膺詔綽叅幹事樞恢張遠圖將肅清於國步登用舊德首厭服於人心郵音播傳輿論欣穆伏惟某官才本人傑學為世師聞望冠於三朝風采傾於四海論關休戚炳若著龜之明行蹈險夷挺然金石之操雖綠

野之居甚樂而蒼生之望益深果下賜環趣覲行殿亟踐廟堂之舊倚平疆場之虞江左之見夷吾已期剋復魯人之思季子皆喜來歸諒少展於謀猷即盡戮於禍亂書功不朽指日以須顧惟衰遲夙叨知瞻念收迹江湖之上獲庇身陶冶之中抃躍私誠倍萬常品

回賀正啟

王正謹始人統開端惟時耆英宜享壽祉伏惟某官才周庶事學富多文方茂對於春祺諒亟還於天闕過蒙

慶問第切感銘

回趙相公啓

比者濫膺詔綽叅執政樞未遑坐席之安更躡朝班之峻寵私皆至控微懇而弗俞憂責併加撫哀蹤而靡稱懼形心骨愧溢面顏伏念某出自寒家本非遠器干祿之學曾不足以裊身負薪之言夫豈堪於謀國頃緣虛獎馴致徹官久貽尸素之譏甫遂歸田之幸聖恩未既遽因簪履以見收愚慮已殫無復絲毫之云補不圖兩

月而閔三遷屬當郊壘之多曷贊帷籌之祕深知忝冒
積負兢慚此蓋伏遇某官道合天民才優人傑功高社
稷久登翊於睿謨望重搢紳專統盟於善類夙借吹噓
之力曲為根柢之容遂使衰年復叨殊用崇墉在望尚
稽感臆之陳寶翰流音亟辱慶緘之貺銘藏之至敷敘
莫周

與浙東安撫趙相公啓

伏審某官上丞相之印辭榮廟堂分刺史之符作鎮藩

服倣開盛府誕布寬條想風采之一新知歌謠之四出
伏惟某官忠存社稷德冠天淵出扶邦運之危上簡帝
心之眷沛然膏澤既得百姓之心赫爾威名方制四夷
之命決策已定脫屣如遺茲高謝於成功以大振於頽
俗平津之開東閣翹材盡萃於一時裴度之守北門殊
禮佇觀於他日公歸未晚人望如斯退省哀蹤久叨未
契欽勇退之節雖遯想於高牙賦遯歸之詩即首迎於
華袞依鄉之切敷敘曷殫

知樞密院回前執政啓

里巷投閒方少休於疲曳巖廊圖舊俄復玷於寵休顧
陳力之不能當試可而乃已靡容控避祇負兢慙某竅
縈寡聞尫羸多病昨以粗糲之質進與廟堂之游過計
拳拳雖有徙薪之慮空言落落卒無橫草之功恐孤奉
於明恩期退藏於晚歲不圖遠外猶累簡求位唯樞機之
臣職在甲兵之問未之學也豈能忘尸素之憂方且圖
之何以濟艱危之會拊心惕若承命赧然伏惟某官

云

云致是迂愚復茲忝冒時哉不可失固欲勉於著鞭老
矣無能為誠恐貽於覆餗尚祈告教少逭譴訶猶稽柔
牘之修遽辱珍函之貺謙光所逮朽質為榮愧感交深
控陳難盡

趙相公

盛德冠時勲名蓋世身雖勇退委萬鍾如脫屣之輕計
或決行措四海若覆朽之固素緣知睠嘗贊設施

韓宣撫劉宣撫

忠貫神明功存社稷將制四夷之命共圖九廟之安

李相公席叅政


盛德冠時傑才經世心存王室每敷納於嘉猷力挽人材專統盟於善類曲敦交際公賜揄揚

孟留守

厚德鎮浮殊勲翊世典刑所屬暫司留鑰之嚴體貌方隆將拜制麻之寵曲敦交際公賜揄揚

李尚書

直道立朝精忠許國曲敦交際之舊每借揄揚之私



龜谿集卷十

欽定四庫全書

集部
鮑路集卷十一

詳校官左中允_臣瑋五珠

主事_臣呂雲棟覆勘

總校官編修_臣王燕緒

校對官中書_臣吳俊

謄錄監生_臣楊兆豐

欽定四庫全書

龜谿集卷十一

宋 沈與求 撰

雜文

碑記贊銘賦樂語疏祝文策題

湖州德清縣重修孔子廟碑

予少時嘗聞諸長老言吾邑初脫五季之亂人樂更生
敦朴力穡未知學也大中祥符間予從祖書記始以儒
學中進士甲科名稱藉甚鄉黨榮之邑之子弟遂風勸

於學其後正議大夫盧公父子踵取名第翱翔要途而學者日寢以盛故有孔子廟基下制狹既不足以揭虔妥靈而衿佩野逸弗克羣處迨明道壬申之歲河南竇充來是邑訊之卜人以為餘不溪來自天目之山注于邑之東南兩山挾之秀氣橫出宜益有搢紳之祥乃作今廟直巽之隅高明亢爽非復舊比而文雅之士班班出焉閭閻相望若應厥卜予結髮亦肄業其中絃誦之聲猶可想也中間朝廷興學而有司便事僅於舊宇丹

聖而已矣然自初考卜迄今百有三年而牆屋頽圯草
茀于唐廟貌雖存丹青缺落使人喟然有寧不嗣音之
歎春秋祀事著于令甲而器幣牲牢之薦弗備弗蠲神
用不享太末鄭如幾隱居溪陰一日過予曰吾儕儒服
顧不若佛老之徒嚴奉其祠以侈大其師之說恥也已
而率邑子沈良能相與告於邑令楊鏐及凡境內之士
大夫士大夫悉勸趨之爭出緡錢以佐其費乃盡撤去
門廡更立而一新之面勢隅落雖因其故而棟楹顯敞

視昔則又加焉爰即兩廡析為齋廬以待學者中嚴廣
殿像設巍然翼翼羣公繪事惟序觀者為之屏息嗚呼
休哉實經始於紹興癸丑之仲冬越明年春上丁行釋
奠之禮落成焉是日也予兄次律攝衣升堂談春秋大
旨凡邑之士大夫濟濟在列咸有肅容邑令跽而請予
文以記予謂國家遭金人之亂義士枕戈武畧是急然
未嘗斯須忘右文之事誠謂捨是則無以為天下也吾
邑令乃能間搶攘之餘導人所欲立學崇祀以夸四方

是可嘉已乃為書其本末而系之以詩曰

餘不之源來自天目注之兩崖其勢若束惟邑東
南山縈水狀始建廟宮茲焉考卜士也來游文風
載郁更時搶攘園蔬是鞠豈其山川秀氣回復厥
有吾徒輸金委粟載新棟楹工靡程督有神司之
不疾而速揭揭元聖端冕袞服羣公從之祀事孔
肅嗟我令尹崇化表俗曰興自躬往繼前躅勉我
士子荒怠則辱惟以嗣音豈惟干祿祥源泱泱庶

來其續

披雲樓記

宣和四年春祕閣曾侯自山陽移守嘉禾嘉禾在三吳
為支郡封域儉狹而物產饒衍居民敦本好約雅稱易
治侯之治因其俗施教條數十示所禁勸民畏慕之相
戒毋犯侯令越數月政成從容語僚吏曰郡雖小然介
江湖之間水舟陸車孔道四出賓客之至無虛日顧其
地洿下無高明之居以稱燕游不足以壯千里觀望盍

圖之先是內相葉公道御於子城西北築亭榜曰披雲
後人更名樓其實亭也庫屋三楹歲久且圯又西北其
戶下瞰通闌烟塵宛轉於几席間非登臨之美侯乃以
完堞餘工悉撤去故屋其基增高培薄取他名材無用
者更南鄉為亭外施重檐而中敞之深明洞達丹碧粲
然亭西挾以水閣曲欄橫檻映帶左右他日與客登焉
送天末之孤帆迎海上之遙岑目力所窮與空為際更
唱遞嘯醵酌流行神意徜徉如在塵垢外信哉披雲霧

靚青天僅足以方其快且適也侯舉觴屬某曰茲游樂乎子為我記之某以謂成壞哀樂奄忽之變在物也物不可以為常顧吾所建立有不可磨滅者物則託焉以垂不朽此羊公所以興峴首之歎而湛輩反自哀之不懈也登斯亭也徘徊四顧蓋吳越交兵百戰之場而勾踐夫差之爭雄也高城深溝有荒田野草之悲穴狐狸而伏魍魎也其人骨已朽而其事為可哀也前年盜弄潢池兵傳吾城連三日夜民大震擾天子至出禁旅討

平之盜去而城完因得創亭其上一觴相屬是可樂也
侯生於相家文章事業稱天下設施當有大於今日者
則名之傳山川猶將託之不朽況斯亭乎故亭之成壞
情之哀樂有不足言而侯之功名為可勉也於是乎書

水陸報應記

趙丞相云頃年關中聞有一士人被酒夜卧於道傍堆
阜之上夢有人呼曰城南某人家設水陸我輩當乘此
託生可同往堆阜之下有人嘆曰一醉人卧於吾上出

不得奈何未幾前所呼者復至曰水陸甚盛但不甚精
潔聖賢不降不為利益君有噓嗟之聲已而曰久饑粗
得一飽其人復應曰饑甚雖一飽亦不可得是無福也
旦而視之堆阜乃一古冢也鬼神之事茫昧難知然水
陸報應甚多大抵不可不精潔今因兒子往妙香宮設
此供故錄示長老佛智大師紹興五年七月丁酉必先
書

劉希顏真贊

目送孤鴻心徹寒泉風神散朗儀狀毅然掀髯一笑呼
吸雲烟是為宗廟之貴器自號山澤之臞仙

葛魯卿研銘

野人闕古溝獲黥石研而異之以歸於丹陽葛公公屬
其客吳興沈某為之銘曰緻而澤靈液之藏橢而豐瑞
璞之章先生婆娑翰墨之場天授茲器殆文字之祥也
邪

客游玄都賦

南陽公數徵不腆之文然銜談巷語陶寫性情已即擲
去如棄唾漫不復顧省寧暇著橐刺人目耶既數月公
更書下錢客在門恐遂泯默則為他日恨輒賦客游玄
都因公懸弧之旦用以為壽其詞曰客有夢游玄都之
宮覩一公子緇衣繡裳下觀蠻觸之閔儼束甲乎戰場
俄而免胄四顧周章少焉休矣息閑影藏粵有一老長
身臞然深衣而黑緣緩歌擊節起舞踟躕揖公子於下
坐曰予方外之毳客不知人間禮法之嚴公子之貴也

抑嘗觀蜡齒於列座訪燕毛於廣筵莫如予年長矣公
予其自言之公子曰嘻先生其恥予也耶予生於三江
長於五湖跨瑤光之象負溫洛之書蓮房晨嬉著室夜
娛嗟日月之幾何戴神屋其如初此猶未足以語壽也
蓬萊岱輿員嶠方壺以與夫瀛洲五山之根出沒乎歸
墟彼舉首以戴之從禺疆而遞命者實予之徒也先生
以為何如先生爵里奚居譜牒奚自豈周穆王之遺民
抑丁令威之嫡嗣也不然何得渠略視予而以大老自

恃耶先生曰有是哉子壽可期可以策計若子壽者蓋不知其紀也一瞬目而千歲一舉足而千里鍊金氣於丹臺之爐導玉腴於華池之水引脰長嘯聲聞帝庭子夜沈沈天門未扃刷騏驎之捷步輦鸞鳳之翺翺縹緲碧落徘徊紫清羣仙命予以九還之使持絳節而擁霓旌公子曾未免夫泥塗之累網罟之患豈足以族十五黿而友四靈者哉公子曰然則奈何先生曰公子中溫文而外健武能納新而吐故其亦壽之類也曷不捨輿

渫趨爽塏以為生之衛也予聞南陽之墟下有菊潭公
子其往游焉朝緩步而夕可至也酌餘波之清冷擷遺
芳之薜靡屬霞觴而自侑渺天香之泛齒插子翼乎崑
丘庶幾閱少廣之終始公子曰唯唯覺而賦之以薦乎
南陽公之壽几

燈華賦

耿宵寒之不寐兮起攬衣而跼蹐無以散余之幽憂兮
憑插架之叢書引短檠使置前兮聊縱觀以嬉娛注膏

油續餘燼兮發雙照之清臚曷孤光之炯炯兮含生意
其斯須曾不根而自華兮騁便娟與扶疎初蓓嬴之星
懸兮葩萼爛其紛敷中鬱勃而旁分兮熒明滅而乍無
乍晦曠而蔽虧兮辛勤余之翦除悼飛蛾之撲緣兮猶
若擷芳而採腴童子旁睨而竊笑兮曰此吉占奚忽諸
苟禦福其不祥兮余豈廢書而改圖憂喜聚門唯所召
兮獨何為此華之覬覦彼九華之歲蕤兮灼百和之淳
蘇散春風之列炬兮導珠翠與笙竽挾光景以舒秀兮

紛榮落之自如豈其規福而樂黠闇兮蓋以衆而函胡
相風釭之一枝兮屬山澤之臞儒辨牛毛之瑣細兮忘
鶴髮之縈紆緣桐君之藥炮兮詫微光於鄰壁之餘童
子曰噫嘻吁呼已見背於羣趨兮悲夫主人之愚余掩
卷而三歎兮悼此言之甚迂物不可必兮神不可誣忽
若太乙之下臨兮蘸青藜以燭余余何為感此嘉貺兮
豈以夫余所讀者道載而與之俱儻此花之可授兮眇
傳燈之老瞿

天寧節致語

一氣周天水行協而景風至千齡接旦火德盛而滎河
清是開震夙之祥寶顯神靈之異無疆受命有截傾心
恭惟皇帝陛下秉籙頒常握圖建極席慶紫霄之上匹
休黃序之前經緯萬方如家至而日見出入六合本神
動而天隨妙用中藏全謨外發振張祖考之丕績興起
帝王之極功故得九廟延禧二儀薦祉壬辰紀運已驗
寶符之文甲子復元遂增神筭爰屬誕彌之節共

霑燕衍之恩喜浹衢尊誠均封祝衍皇基於億載發民
謳於四夷臣猥以微生逢茲昌祚莫奏克庭之技徒賡
擊壤之音遙望天墀上陳口號欲識樞星紀誕彌天人
端命撫昌期聲函萬歲騰驩頌節應千秋舉慶儀金篋
賜齡輝碧簡珠囊薦壽肅丹墀何須更效南山祝艮嶽
連雲自不移

館待接伴少卿樂語

屬國勤王來效貢輸之職端朝命使往宣逆勞之恩方

仗節之遠臨宜征塗之少憩恭惟接伴某官望隆朝右
名滿人間以師友之淵源為文章之光焰襟懷磊落森
森若千丈松宇韻風流濯濯如三月柳蚤動冕旒之
邃徧躋臺閣之華公言所歸睿意彌注輟自月卿之列
授茲星使之權正行人之官雖云將幣過諸侯之國固
許致饗知府某官喜覩儀形願聞規畫肆筵設席考禮
度於故常鼓瑟吹笙按樂音之純繹儻劇厭厭之飲庶
觀秩秩之容但某等猥以賤工叨居樂部宜有口號上

瀆台顏九重簡注輟名卿仗節東來為遠人貢篚百年
旌屬國使輶千里導陪臣遵塗行對三山曉開燕爭看
一笑春無疾其驅今有詔趣歸持索侍嚴宸

館待高麗進奉使樂語

八月浮槎舊識遼東之使節九天出綽新叅漠北之賓
儀方朝廷旌守圉之勤宜邦國謹充庭之實聿遵彛制
共樂昌期恭以進奉某官將命嚮風馳誠就日跨萬里
鯨波之險趨九重鳳闕之深爰屬經塗適當授館知府

某官甘棠訟息茂草囷虛喜逢嘉客之臨特展芳筵之
好調絲縠竹騰聞皦繹之音舉白飛觴備講獻酬之禮
願盡此時之樂事留為後日之美談某等猥以賤工叨
陳末技幸閤從容之集宜修蕪累之詞仰瀆台顏敢陳
口號仙槎渺渺出鷄林路指神京歲奉琛四海已同朝
禹志萬年宜罄祝堯心儀叅大客恩方茂位亞羣公澤
更深況有王人宣德義經塗莫惜費登臨

薛林二太尉特排樂語

旌旗炫日屬元老之相逢樽俎浮春念故鄉之孔樂一時榮觀千里驚傳恭惟特進太尉中書太尉道合真儒功存舊弼四海仰廟堂之同德九重知帷幄之協心鳳閣鸞臺曾記並游之盛龍韜虎帳更瞻分鎮之雄離合萬端猷為一揆甫申之輔周室豈止藩宣姚宋之相唐朝行資謀斷會有過家之便宜從授館之勤知府某官喜覩儀形欲親談笑茲奉千鍾之壽以交四座之歡樂備歛趨窮里社謳歌之勝禮行酬酢忘朝廷體貌之尊

將紀英游永為嘉話但某等叨居伶籍獲侍鈞顏不揆
荒蕪敢呈口號三吳分野直中台一日驚傳二相來桃
李蹊間紛組綬湖山影裏炫尊罍清談道舊真難繼淺
笑追歡許易陪須為故人成徑醉已聞雙詔下銀臺

館待抗帥樂語

大編凌波方重西州之別高牙照路遽分南顧之憂共
瞻元帥之啓行式壯列城之勝勢恭惟安撫某官宏材
驚世偉望映時氣貌冲和濯濯如三月柳持修挺特森

森若千丈松蚤繇天府之華遂陟霜臺之峻九重簡在
四海想聞為鈞為衡將圖一命之袞之屏之翰暫臨十
國之連寨惟甫屬於按行弭節益敦於交際知府某官
方歸總制薦奉儀形况當卜夜之期適值班春之候金
絲間作庶欲佐於清歡醴斚交飛亦何辭於徑醉示一
時之榮觀為百年之美談某等猥以賤工獲陳薄技敢
呈口號上瀆台顏熊羆千騎駐南州謀帥來寬旰食憂
草木也應思潤澤湖山正恐費遨遊旌旗炫日催前導

樽俎浮春許，
罌留劇飲不須辭。
徑醉詔環聞已戒，
鳴騶
秀守館待交代樂語

旌旆留春千里聽，
告新之政尊疊競。
日四筵陪道舊之
歡，
蓋雅躅之相承允昌期之所重。
式敦交好以鎮羣情，
恭惟知府某官一時吏師三代人傑，
學擅南豐之舊氣，
陵北固之高抹，
月批風見襟懷之磊落，
撥煩劇劇出談笑之從容，
政成暮月之間名在重霄之上，
解組去郡行轡造朝，
寄傲風流，
徒發南樓之興論，
思密勿將陪西掖。

之遊知府某官契重金蘭情均膠漆不改袁公之約束
欲追召父之歌謠樂備歛趨願奉千鍾之壽禮行酬酢
期存百世之盟儻投轄以忘歸庶盍簪而徑醉但某等
叨居伶籍獲侍台堦不揆荒蕪敢呈口號一麾相望繼
芳塵召杜風流主與賓芸閣去方思就日竹符來及趣
班春清談款密看論舊善政從容許告新早晚銀臺雙
詔下共期持橐侍嚴宸

代天寧功德疏

有王者興既協生商之命使聖人壽咸慶祝堯之心惟是假於靈文茲用申於善頌皇帝陛下伏願永膺帝祚誕保皇圖衍周詩多子之祥享箕疇五福之證歸謳歌於四裔率土底寧卜厯數於萬年後天難老

乾龍節開啓疏

十四月紀帝堯之生慶鍾是日三萬歲頌遂人之壽喜
浹斯民仰扣覺雄式祈睿算淵聖皇帝伏念降年有永
受福無疆孔子之居九夷適丁厄運穆王之馭八駿亟

返畏途載臨誕聖之辰彌罄歸君之祝

乾龍節滿散疏

舜風解愠適四月維夏之期商飢發祥契千齡復旦之
運式祈睿筭宜藉勝綠淵聖皇帝陛下伏願多難而興
大德以壽天旋寶仗百六之會亟平歲奉凋觴億萬之
年永固

天申節開啓疏

帝眷命而生商允符長發之慶民謳吟而思漢光啓中

興之圖敢仗真乘仰祈睿算皇帝陛下伏願降年有永
受福無疆亟還天邑之居端享法官之御神民萬物同
臻開泰之期壽富多男並協延洪之祝

進天申節功德疏

多難啓聖共占震夙之祥一德格天自獲龐鴻之祉表
微臣之善祝集淨侶於嘉辰庶藉真乘式增睿算皇帝
陛下配天覆濤象日照臨一清戎輅之行盡平僭亂大
正法宮之御永享壽康

泗州傳衣塔祈雨疏

比歲告饑民方罹於艱食常賜為沴天復降於疾威念
吏道之興妖致農工之失職被躬省咎雪涕祈哀仗大
士之悲憐憫羣生之危阽慈雲廣布法雨周施霈然嘉
澤之流戢此驕陽之熾庶令老弱旋見豐登

昊天殿祈雨疏二首

瞻彼甫田蔚然多稼行遂九秋之望尚愆一雨之期惟
是高原亦既亢旱冀昊穹之昭格俾時澤之周流降此

康年恃之卒歲

薦饑之後艱食是憂望嗣歲之豐登脫斯民之流殍而
常賜為沴時雨久愆麥齊壘而復萎禾入土而隨槁三
農危懼百吏倉皇惟仗籲辜之誠可瀆蓋高之聽伏望
垂慈下土徧敕羣神令出風雷大霑雨師之澤候分雲
漢亟收旱魃之威尚幸時之小康用拯民之大命

三清殿神霄殿祈雨疏

運在金穰已屬豐年之望時方火老爰申亢旱之憂乃

聞高原既泣枯穗仗霄晨之丕佑幹陰陽之至權雲上
於天用敷剛健之德月離于畢終至滂沱之祥

佛寺祈雨疏

豐年已兆嘉澤尚愆雖蒙一雨之濡未厭三農之望敢
憑精意叅扣覺慈翼法澍之周施抑驕陽於已熾滋我
多稼溢于大田

代修武烈帝廟疏

遺象森嚴示無忘於馨烈叢祠圯陋懼弗稱於明威比

祈保障之恩嘗致繕完之懇昭茲盱眙曉以機祥初既
協於象占已乃形於夢告終蒙靈貺遂成屏盜之功載
省初誠敢費鳩工之事眷惟此郡實其故鄉嘉與永懷
之流樂輸崇飾之費

奉迎嘉山龍井水祝文

矯矯神龍惟水為所吹噓成雲噴薄成雨惟茲井泉為
龍所主一勺之多澤徧九土挈此瓶罌置我庭宇煜煜
電壺坎坎雷鼓發揚英靈浹洽周溥溉我田疇滋我稷

黍母使我民仍歲饑阻則惟報之如御田祖

金山廟祈雨祝文

秀居湖海原隰之間厥壤斥鹵三農於水無所蓄藏故
雨涉旬則病水不雨涉月則病旱水旱之禱不容不瀆
春夏之交千里龜坼嘗滯懇於爾神神實憫之賜以甘
霖守無以答揚神之休德既上其事請加封崇今者不
雨亦既兼旬多稼向萎通渠就涸居民行商皆以病告
守不忍避瀆神其嘯召風雲雨我邦域掾此沴氣卒為

豐年守亦俾民承事益謹謹告

太學秋試策題

古之所貴於骨體之臣何也人臣剛正有守尚氣節敢諫諍國勢恃之以強猶骨強四支也宮之奇懦而不能強諫鄰國知其必可假道汲黯戇而好諫叛國畏之至於寢謀國勢強弱從可知矣然而君子處心積慮欲人之無過而已指人之過而正救之自敵以下有不能堪不幸人主有過舉犯顏色觸忌諱干不測之誅以數批

逆鱗豈得已哉古之君子願為良臣不願為忠臣抑有以也不得已而有言言行善歸吾君福在天下可也其言不行去其位可也去其位亦非君子之本心猶日望之庶幾其改也事不求可功不求成悻悻然訐而賣直徒使人君有拒諫之名而無補於國宜君子之所不取古之人善納諫者莫如唐太宗善進諫者莫如魏鄭公史稱太宗見為嫵媚則鄭公豈好訐哉是以諫行言聽君臣俱榮眾君子學史舊矣求古諫諍之臣拳拳愛君

直而不許可以為後世法者試件其人以告若夫充位不言曰吾惡為許如陽城等輩又非君子之所欲聞也

召試館職策題二首

東南實古吳越百粵之地號為富强自春秋以來略可考也隋唐都於陝洛歲資邦國之用多在東南委輸常過天下之半主上遭時多故治兵東南恭勤節儉出於聖性之自然故凡冗費悉從蠲罷唯以養兵為急然而公私力屈日以更甚其故何哉異時財賦粟帛之出於

東南者猶可件數也今有司坐失經常之入每以乏告顧獨取之民民愁無聊得為便乎宜理財者無其術耶抑取之涓涓洩之浩浩有不勝理者歟理財曰義孔子之言也雖然理財亦多術矣商鞅力本務農之說與管仲等也劉晏抑商賈而籠天下之貨與桑弘羊等也李異之徒其術又下於晏而後世論者予管仲而黜商鞅予劉晏李異而黜桑弘羊豈用之或異耶今議者欲舉理財之政以革東南一切之弊鮮不流為數子之刻心

計之失必以病民姑舍是而求合先王理財之義以救今日軍興之急宜必有說焉願條其要以備上之採擇自古撥亂之主未有如周宣王者而詩之所稱在車攻則曰內修政事外攘夷狄在烝民則曰任賢使能周室中興夫唯政事既修矣而又分別賢能而任使之故能攘夷狄復境土紹文武之絕業而致中興也國家遭中微之運敵人內侵蓋八年于茲矣主上聖神英武自足以運動六合儻因天意人心之歸恢復中原不為難事

然猶勵精圖治虛已用人兢兢焉日不遑暇仰惟聖慮必以上策自治莫先於政事人才之間故耶夫政事之在天下可則因否則革不可膠也揆之於時措之宜尚有可施行者歟叅之於救弊扶偏之說尚有可更張者歟賢能並用濟濟在列然臨事有乏才之歎其或濟時之才隱而未用尚有可以博蒐訪而廣儲養者歟凡此皆當今之切務而中興之功恃以成者今發策以試三館之士將為時用非直取其空言而已願條其利害之

實悉著於篇以觀所蘊

擬御試策題

朕德非陋紹承大統遭家多難求濟未獲是以博延豪俊咸造在庭覬聞治道之要予大夫其必盡精極慮樂為朕言之蓋聞在昔聖王之治天下正心誠意躬行乎上者固自有道而措諸事業之間則或寬或猛或質或文變通隨時不膠於迹故其成效布在方冊昭昭乎其可觀也朕甚慕之越自即位九年于此矣愚欲雪父兄

之恥而復祖宗之烈夙夜祇懼罔敢荒寧而施為繆盭
治效缺然深惟其故不憚改作間者乃下銓量之令以
擇吏而真才猶未顯也嚴科斂之禁以恤民而實惠猶
未孚也謹簡練之法以治兵而冗食猶未革也夫吏道
未肅民力未蘇兵勢未強朕之治所以未效也顧何以
輯事功弭禍亂哉而建議之臣并欲考課以核殿最省
官以抑奉稍力役不足以供餉饋也為之屯戍營田以
寬之賦入不足以給調度也為之平準均輸以佐之爵

賞未艾也為之定武功之等紀律未明也為之叅府衛之制凡若此者其合於古便於今乎其或有不然者耶雖然此治之迹也上之欲三辰明四時序災沴不生而動植遂性下之欲風化行習俗厚姦宄不作而中外協心茲可以占天人之助矣夫何敵不克何難不濟興復大業其庶幾乎予大夫以為何修何營而可以臻此其條列而茂明之務適於用朕將有稽焉

龜谿集卷十一

欽定四庫全書

龜谿集卷十二

宋 沈與求 撰

行狀

墓誌銘

祭文

青詞

定書

朝請大夫盛公行狀

曾祖得中故不仕祖卞故仕漳州司馬監押累贈右千
牛衛大將軍父僑故仕左朝奉大夫直集賢院知越州
累贈朝議大夫公諱允升字德常其先餘杭人公之四
世祖蟠仕錢氏爵位通顯錢氏舉國內附遂徙建德至

集賢公宦遊吳興樂其山水因家焉公資稟端亮自少
小屏絕嬉弄力學問道古今屹然如成人稍長喜為文
辭采膽蔚一時賢士大夫咸稱其能元豐間神宗皇帝
闢上庠以經術造天下士公挾其藝往試率占上游流
輩多所降屈已而更元祐尚聲律公自度雕琢之學雅
非所好去之不復問三年哲宗皇帝親郊詔五品皆得
官其子遂以集賢公蔭補太廟齋郎調開封府酸棗縣
主簿未赴會集賢公捐舍館護喪歸葬潤州即廬次哀

毀癰然杖乃能起卒喪尉潤州之金壇哀弗忘也秩滿奉太夫人還居吳興屬歲饑盜充斥境內州將病之先是烏程尉闕正員檄公攝領且語之盜公分曹督捕擇所脅從縱使緣畝而執其渠首械送州一境帖然州上其事司勲以格進官一等丞蘇之崑山縣崇寧元年官制行授登仕郎公之丞於崑山也事有便於民無巨細輒舉之其非所便不問久近必去乃已代有期傾邑詣州泣留公再任州不能奪請于朝時上方建鄉校復里選

欲得能臣倚以辨事有旨從之邑舊有先聖廟庠屋纔數楹公承詔一切更撤根椽寸甍不斂於民而落成先於諸郡部使者才之聯牘言上三年召至闕改宣德郎簽判杭州未幾代回攝開封府司刑曹事尹辟公真命且下公獨念太夫人春秋高不樂北官丐還舊職是時東平呂公惠卿帥杭被旨擇才吏訪境內逸迹備修九域圖志杭於東南為大銓次居多帥難其人比公至喜曰吾事辨矣即一以屬公公搜抉無遺事數月書成奏

御遷通直郎通判揚州大觀二年上躬受八寶恩遷奉
議郎往歲淮甸小歉春秋二租及官所貸緡錢在民者
詔悉閣之而强家大姓夤緣為姦其非所應閣者詭免
甚衆歲且豐猶抵之不以給上事公具簿最勾稽得實
諭使償凡為錢數十萬以佐外計遷朝奉郎太夫人壽
且九十矣念歲時姻族燕游之適在官下心未嘗一日
忘吳興公惕然曰吾始以親故仕今所居非親所好雖
食萬錢誼不忍即解印紱致其事以歸左右就養惟謹

居無何太夫人以壽終公執喪如集賢公時益不懈政和二年當路以公年未艾才不宜遂休表復用訓詞褒許即以舊領階官司開封府戶曹事方朝廷考正徵角二聲為燕樂以釐革鄭衛淫哇之習公上所著樂書數萬言論辨古樂所以析用中正之法甚悉上嘉用之改儀曹兼大成府製造官三年司勲奏公曩攝邑蘇之常熟捕獲盜鑄金錢法應賞由是累遷朝請郎九月燕樂成上命輔臣覆視唯公所製精妙一時特恩遷朝奉大

夫踰月賜服三品皆異數也四年營奉明達皇后寢園
與有勞遷朝散大夫俄得請知秀州五年公猶待次鄉
郡以大晟奏功還朝請大夫一日忽語所親曰始吾乞
身强健自謂終老里門詎意及此今而歸竅足以侈上
恩可但已耶因復請休於家理別圃莒雪之上幅巾藜
杖往來其間澹乎若與世無營者閱秘典日數百紙要
以了達生死人亦初未之知也居數月感疾命諸子具
祕器上壽藏既乃曰後事豫矣瞑目何憾即折簡素所

從游告以逝日至日終于正寢治命不亂其悟解乃如此實政和六年閏正月十八日也公雅有策畫臨事不為苟且之計所至績效藹然有聞於時故所遷官率繇懋賞獨於榮利恬靜比再挂冠年猶未衰南州士大夫高其行愛慕在色使公徜徉以進則其所施設何如哉享年五十有八娶孫氏封宜人子男六人曰康迪功郎婺州兵曹掾曰虔迪功郎坊州司刑曹事曰庚庠庶序皆游鄉校為儒生女七人長適登仕郎朱德延次適迪

功郎錢均次適貢士陳琦次適貢士吳景信次適太學
博士錢圻餘尚幼孫男一人女二人明年三月十四日
諸孤奉公之柩葬于烏程縣九元鄉金蓋山之原先所
卜也某與公實同里而公之子度疏其治行屬於不腆
之文且曰將求名世道德君子銘焉以圖不朽謹敘次
于右端謹狀

朱夫人墓誌銘

夫人朱氏世為湖州安吉人父繹太廟齋郎自其曾高

以來號以賢雄於鄉然儒服蟬聯素風甚飭夫人幼而
莊靜整整有家法父母愛之為擇良配得同里潘侯師
仲歸焉夫人之歸逮事其姑能先順意適卒以孝婦稱
於族黨之間事其夫恭謹如待遇嚴賓客娣姒雍穆怡
怡如也潘侯少小喜自振拔其交游多四方才士大夫
館穀如歸至傾家不問絲竹之娛帷帳豆觴之具必極
精腆夫人職之也歸十年生三男子曰芑曰莘曰菁潘
侯卒時夫人盛年既終喪宜改適夫人聞之慟絕自誓

弗許然二子甫勝衣其季在襁褓未能誰何也夫人克
奉潘氏祀字其孤有幽閒淑慎之操三子既稍長知事
夫人一日斥奩中物幾所於庭悲泣不自勝呼三子侍
旁且誨之曰汝父生平時鏃意欲立門戶非苟然者不
幸棄諸孤蚤世吾哀亡撫存雖鞠窮不悔吾心固有處
也今汝曹齒宜學其以詩書起家成汝父志顧何以贏
金為其為汝資勉之哉三子相持泣謹諾即招聘四方
知名士館之門下授以儒術如誓云三子資秀發嶷然

可喜也為學務自刻苦在儕類中嶄嶄見頭角黃遂一
舉中乙科授迪功郎調高郵軍司兵曹事迎夫人之官
下會邑及莘由鄉薦肄太學夫人旦暮念之不哀黃乃
奉安輿西游上都以娛其意既至而黃小疾不起夫人
以客樞歸卜居郡之西閨曰吾不忘故里顧吾廬黃兒
時戲劇及其起居寢飯處歷歷在眼中吾不忍眎也汝
曹脫有立庶幾釋吾此哀不然無以吾歸二子奉夫人
訓相戒語激昂益不懈客有相過夫人從屏間閱之其

人賢且色喜語嫺而意嫚輒禁切不相還往故所與游多益者亡幾何莘亦相次中第授迪功郎調衢州西安縣尉歸拜夫人於堂下夫人疾已侵攝衣強起一眎之歎曰吾嫠居三十年天卒相吾二子俱成名芭故未偶度其趣操宜不墜厥家吾死何憾夫人疇昔嗜內典因索其書日誦之彌月忽若有得默然宴坐瞑目而逝其了達死生雖學佛之徒自以弗逮實建炎戊申十二月十九日也享年五十有三有孫男六人曰梅曰楫曰楹

曰格曰權曰相孫女三人皆幼越明年九月某日諸孤奉夫人之喪歸葬於邑之東山鳳亭之岡將葬諸孤載夫人語泣請銘於予予謂人為善患不力誠力未有無其報者夫人志節終始凜凜乎不可奪烈丈夫有媿焉身見二子躡取名第起為搢紳家天之相其為善獲報豐矣鍾鬴之祿顧不能一朝享之殆其賦予然耶茲亦可悲也已三子少從予游且夫人行應銘義不得辭乃為之銘曰

其殖也豐而用之冲不羸其躬其節也正而持之
定不隕其性此古烈婦之所難而夫人能然得不
謂賢也耶是宜神者報之用錫爾祉迄成厥家克
昌厥嗣鳴鳳之岡喬木蒼蒼銘詩孔昭百世之藏
黃直閣墓誌銘

祕閣黃君子虛歿既葬諸孤喪服更造予跣以泣曰先
君子葬未克銘治命以屬公不肖孤其忍廢先君子之
命敢碣墓以請予與君雅故且諸孤請益急則諾而銘

之君諱策子虛其字也其先居建之浦城為望族世有
徹官自大父游姑蘇樂其土俗因家焉今為姑蘇人曾
大父浹累贈奉議郎大父挺仕承議郎累贈金紫光祿
大夫父彥仕朝奉大夫君性豪邁風神峻拔方童壯時
出語已驚人弱冠一舉進士中乙科追和梁昭明所選
詩持見眉山蘇公公期之曰異時必以文顯初選授杭
州司理叅軍折獄精明吏屏息不敢弄以事秩滿授開
封府雍丘縣主簿元符末詔許中外言事是時昭慈聖

獻皇后既復位號而典冊有未盡正者君上書引古義
爭之言劇剴切藉藉聞搢紳薦者以君才磊落不宜浮
沈簿領改授齊州州學教諭會崇寧黨錮之論起故老
名臣鮮克免者君亦坐前所上書刻名黨石羈置登州
二年徙海州既而上皇感寤斥用事大臣破黨論仆其
石立碎之君例還姑蘇休官自號隨緣居士閉戶讀書
益自刻苦為文章瓌詞老氣絡繹間起至其甚得意視
古作者無媿也佳時勝日相羊山水間賦詩自娛澹乎

若與世無營如是二十年故禮部侍郎鄒公浩諫議大夫劉公安世右司員外郎陳公瓘皆以敢諫爭名重當世君從之游上下其議論相厚善宣和中姑蘇守賈誼知君名強欲吏之辟致幕下諸有勢人意君可撼以祿爭為出力推輓齟齬不合去為浙西提舉司幹辦公事移京東改發運司主管文字君亦未嘗薄其官所居稱治上即位之二年改宣教郎通判嚴州明年召對行在所又明年上追錄黨人除直祕閣其在嚴州數以爭可

否忤部使者意使者嫉之誣劾君縱獄事按驗無所得
卒奪一官左受宣義郎罷去退而築室五湖之旁日閱
浮屠氏書要以刮去世故捐愛憎然其了達乃於死生
之際脫然如去來忽一旦盥櫛呼諸子侍前曰吾其脫
於斯乎而輩行自力毋墜吾訓語訖危坐而逝實紹興
二年八月十有二日也享年六十有三娶程氏生三男
曰維曰纓曰縱皆以儒業世其家一女適從事郎胡總
君作壽冢於靈巖之麓手植之木拱矣諸孤卽以其年

十月十日舉君之柩葬焉從其卜也先是君得元符詞
臣手疏載上皇聖訓備言昭慈之復位號乃欽聖追用
泰陵悔意驚且喜曰天也使泰陵之意白於天下死不
恨亟上之君既歿始用昭慈戚屬信安郡王忠厚奏請
詔以其疏付史官示萬世嗚呼君才百於人而不一試
惇惇然為國納忠雖擯斥流落以終其身不少悔其亦
可哀也已
有文集百二十卷藏于家銘曰

山盤盤兮松桂蕭森
川渺渺兮魚龍嘯吟
顧瞻中

丘兮宛其幽深曰惟哲人之藏兮抱器陸沈訊來
世兮誰其賞音

祭張提舉太碩人文

毓質名家作配令族脫畧華腴蘋藻惟肅泊喪所天守
義彌篤有子九齡出入顧復託為純臣慈訓所屬天實
報之終享遐福累命重封金葩鈿軸壽介期頤隆養畢
足詔起使華于此苦服敦匠事嚴不遠鄉曲歸祔佳城
森然拱木吉路啓行哀榮其族躬致奠觴寓茲一哭

祭陳述古墓文

孔子之生也嘗所休止猶惡其木陰迨其歿也戒毋翦伐乃愛及乎孔林陳蔡之郊一飽莫續而塊然堆阜奉祀百世以迄乎今公於孔子之道聞而習之於數千載之後曷其能固結於人心生有顯位足以行其道術歿有遺愛足以流其德音公之歿久矣而此邦之人所不能忘者顧典刑之具在想精爽之如臨像公儀形既修祠事而歲祭墓下猶庶幾其來歆俯視宿草仰瞻拱木

翦然而深茂者蓋樵牧知戒而無斤斧之侵况若某等
推公餘澤以溉學者則永懷之極宜不能自禁一酌而
招此故事也九原可作尚鑒時忱

祭馮中書文

嗚呼公乎才蓋一世高文大冊爛乎星斗之陳崇論閎
議沛乎江河之逝朝廷倚之屹然如山有不可奪之節
搢紳望之凜乎如霜有不可犯之氣是故奮臂布衣曾
不一紀而徑趨直步已正乎廟堂之位常人視之亦既

達矣公所自視猶病乎未試方將跨喬松之年埒伊周之美胡不憇遺為國龜筮乃厭人間脫然而蛻嗚呼天故生公宜必有意其奪之遽亦復何謂蓋上比乎列星增光芒於舍次公之儀形無復望見而其竹帛之勲河山之誓則昭乎數十百世引此一觴文以脩哀公乎不來何以止此盈襟之老淚

為侍從官祭中書張侍郎文

天生異材其必有意待時而為驗若符契公起布衣以

文自藝逮事上皇更踐中外治賦北垂錢流於地頻歲
宿師民罔告匱靖康之初盜用出疆堂堂魏都謀帥不
良城保弗竭襲盜以狂公願指揮萬旅在旁羅拜叩頭
戒無披猖謂公活我卒制一方真人龍翔神器有歸公
來自北謀疾抵龜賜履省戶正冠殿帷直聲流聞上嚴
憚之三接不又集于鳳池孰能恤國如恤其私意誠則
固言直則危匪言之難無難不為口如其心無有隱欺
庶幾百年宏濟無疑梁木其壞天不慙遺訃音告外道

路垂洩矧我在列心言是依同舟濟川公其揖維今也
云亡胡寧不悲公騎星辰攬槍掩輝一觴以訣尚其昭
茲

為侍從官祭郭樞密文

嗚呼豪傑之士終克有為而其所施則有疾遲有端有
緒與時為宜年不待期天或嗇之如大山川龍蛇所戲
利澤發見物無不滋功用不究則誰測知公之所有閭
汗瑰竒目無全牛矧曰割鷄奏刀發硎蘭陵是基動無

留行名聲日馳惟時上皇用公於微延見燕閒左右論
思宵人好欺公見其幾一麾而去無有磷淄明明天子
躬履艱危思見異人甚於渴饑返公于南付之樞機公
曰天子雄武英威如漢高帝光武之資民散未收兵驕
未治曷寧中區曷靖外夷我惟大臣寤興在斯惟既厥
心協謀同辭輔成上志無俾闕遺乃詢仇方尺箠以笞
譬彼壞屋隨顛而支三年有成必濟登茲天胡不仁而
遽奪之上為盡傷股肱其虧嗚呼我官于朝日瞻羽儀

曾未浹旬死生乖睽撫念疇昔失聲歔歔江風蕭蕭丹旄飛飛引觴告訣聊寫我悲

祭劉資政文

嗚呼古風弗還士有異轍氣吞九州或略於細行心畏四鄰或虧於大節公所自期則無玷缺太山喬松礪硯截薛萬木歲寒獨傲霜雪公在布衣聲滿橋門諍臣之篇蔚有名言仕而克踐惟恐有聞人所甚難公處不煩絳帳幃帷出入師儒勇冠峩峩屹立天衢曰婉孌者匪

予之徒迄自奉常遂躋禁途惟是靖康國勢岌岌邊遽
日奔敵來益急肉食者鄙私忿角立公抗論之去位而
泣真人御極還公於朝貳卿常伯恩榮孔昭公發忠言
不替夙宵南昌之禍匪公之招天子有命一洗公冤意
將復公以掖至尊炎方瘴毒死生乖分喪來自南莫返
忠魂嗚呼哀哉惟昔文正搢紳之師公實希之極力以
追立朝之節此心庶幾強恕求仁化及惇嫠我從公游
垂二十年公一見我推挽後先我豈忘公平生之言百

年莫贖尚可忍論何以奠之生芻一束侑以斯文失聲
慟哭嗚呼哀哉尚饗

焚黃祭文二首

維年月日嗣子沈某謹以清酌庶羞之奠敢昭告于先
考承事之靈某不孝蒙先人遺訓得官于朝弗洎之悲
昊天罔極今天子有事於明堂霈澤四海厥有贈典追
賁埏塗恭致時羞以燔綸告惟先人其克享此休寵用
庇子孫瞻望松楸不勝永慕嗚呼哀哉尚饗

嗚呼哀哉昊天不仁早奪吾母蓼莪之感曾莫報於劬
勞濡露之悲空永懷於怵惕今天子禮成宗祀澤霈九
泉錫號疏榮載于綸告庶幾可慰罔極之恩慈顏如臨
其克享此休寵用庇子孫

權殯告淑人范氏文

嗚呼哀哉君歸我家十有九年我仕不偶半世速遘鞠
窮閔凶奉我周旋克相內事見謂為賢比我叨榮遭時
多艱心期安平白首相歡別我經旬歸斂君魂空閨無

人誰與話言嗚呼哀哉弱子稚女號呼徹天失此慈母
誰拊誰憐顧瞻山林卜云未安今舉君柩槨葬祇園牛
衣之泣尚何可論長號永訣失聲煩冤嗚呼哀哉尚饗

安葬亡妻范氏祭文

嗚呼自君之逝既閱初祥窀穸未安夙夕靡忘爰得卜
吉大壯之陽與我先壟喬木相望將舉君柩茲焉永藏
引觴告訣言出涕滂嗚呼哀哉尚饗

焚黃祭文

曾祖太子太保 曾祖母同安郡夫人方氏

祖太師

祖母魏國夫人孫氏

某蒙祖宗遺德獲以儒學致身于朝與聞政事厥有裨

典及我曾祖一再錫命而至宮保

曾祖妣云及我曾祖妣一再錫命疏封大

邦祖云及我先祖申錫寵命位極公師祖母云及我祖妣申錫寵命遂開全魏之封

贊書具存謹

燔以告伏惟英靈昭茲垂福于後尚饗

先考太子太師 先妣濟陽郡夫人丁氏

某不孝被服慈訓夙夜兢兢罔敢墜失獲以儒學致身

于朝與聞政事厥有褒典及我先人申錫寵命至于宮

師

先妣云及我先妣申錫寵命疏封大邦

贊書具存敢燔以告嗚呼弗洎

之悲昊天罔極尚其昭鑒垂福後人尚饗

通義郡夫人

某蒙天子恩矜致位于朝與聞政事厥有褒典錫君大
郡之封茲亦榮矣贊書具存謹燔以告嗚呼糲食布衣
同我艱苦榮不逮生胡寧不悲尚其鑒之服此休寵尚
饗

追薦亡妻淑人范氏設醮青詞

魂氣無不之用返歸於真宅道術無不在示濟拔于延
塗輒罄哀誠仰干洪造伏念臣亡妻淑人范氏比嬰微
疾忽隕盛年日御遄移霞衣永閼一生艱苦之狀何忍
回思罪垢之因須憑追悼是用祇延羽服光啓蘭場演
三洞之道言營九壇之法事哀集勝利洗滌宿愆長夜
冥冥冀脫幽關之趣圓虛渺渺願陪仙路之遊更錫羨
於私門普承休於妙蔭

生日設醮祈福青詞

列宿昭回分直受生之次層霄縹渺密持司命之權敢
露危衷仰干洪造伏念臣性資蒙昧家世伶俜偶奮跡
於寒鄉驟登名於臚仕雖福輕乎羽全繫覆護之恩然
德輶如毛每懷顛覆之慮頃悼亡於私室俄去位于公
朝終戒滿盈遂投閒散尚懼身既湛於世俗行或負於
神明動積愆尤居亡解謝適會劬勞之日肅事禴禳之
科恭款琳宮具宣藥笈薦蘋蘩之品庶存貴質之儀陳

螻蟻之誠必達蓋高之聽精純感格矜蠻顧臨整雲旆
之逶迤開天門之詖蕩正直是與願盡滌於百非壽考
且寧期永綏於五福

定親書二首

藉甚名門託高明之可援茂然賤息懷伉儷之是求諒
事契之相重許姻聯之復締某第二子青衿業墮道學
未優伏承賢女小娘子彤管訓嚴德音甚美恭馳五兩
之幣願結二姓之歡鳴鳳鏘鏘想發占於永世天桃灼

灼期見詠於宜家

為葉內
翰撰

烏衣羣從嘗陪再世之游丹桂諸郎雅重同年之好儻
綠夙契復締華姻伏承令孫女柔惠慈祥德音甚茂而
某姪孫某稚駮朴鄙道學未優屬當伉儷之求宜託高
明之援恭馳信幣願結歡盟

為長
男

回定書二首

宦學從游雅有潘楊之睦昏姻合好願交秦晉之歡伏
承令郎某官名第相先人門俱勝而某第幾女笄儀甫

就壺則未閑豈圖葑菲之求適遂松蘿之託相攸甚樂
敢無告於良媒卜世其昌將有依於令族

奉承祧之祀宜得名家稽合姓之文猥從衰裔豈攀援
之敢爾亦氣類之適然伏承令弟先輩種學已優秀發
桂林之上而某姪孫女肄儀猶簡迨及桃華之初既諧
卜世之昌克遂相攸之樂將歸令族敢告良媒

龜谷集卷十二

龜谿集後序

叔椿少時聞龜谿先生以文鳴當世及長從搢紳賢士
遊又聞以直道結主知以盛名諧人望由是歷霜臺冠
常伯兼翰苑兩總天官進叅機務再秉事樞崇論閎議
鴻文大冊天下傳而誦之謂常楊燕許復出矣叔椿每
得一篇笥而藏之如獲至寶每以不及全見斯文為恨
淳熙紀號之三禩叅政姚公以天子大臣來守泉越數
月政清訟簡出龜谿所為文十二卷命叔椿為之讎正

玩味不能釋手留月餘始克歸其書又俾為之敘竊喜
附名不朽有榮耀焉乃不辭而承公命嘗觀皇朝晏元
獻公被遇仁宗而富文忠公繼登揆路冰清玉潤勲業
宏茂載在史冊後世歆豔龜谿公丈人行也其名德相
望前後輝映又能集其文而流布之益昭述作之懿顧
不偉與先生諱與求字必先仕至知樞密院事紹興七
年六月薨于位若平生出處之大方則有給事劉公一
止狀其行事為詳茲不復列四年三月一日從事郎克

州學教授永嘉張叔椿敘

